

selangorkini

PERCUMA

PP 19570/07/2020 (035196)

EDISI 13 - 19 JUN 2024

www.selangorkini.my

Sultan titah kukuh perpaduan kaum


Sultan Sharafuddin Idris Shah Alhaj seru rakyat kekalkan perpaduan, keharmonian dan kestabilan berikutan penduduk berbilang agama, kaum serta etnik selaras identiti Malaysia dan prinsip Islam

MUKA 2

Tidak naik cukai pintu hampir 40 tahun

Pemegang hartanah boleh buat bantahan melalui pihak berkuasa tempatan ikut tempoh yang ditetapkan. Berdasarkan Akta Kerajaan Tempatan 1976 (Akta 171), nilai baharu boleh dibuat setiap lima tahun

MUKA 6



Duli Yang Maha Mulia Sultan Selangor Sultan Sharafuddin Idris Shah Alhaj diiringi Duli Yang Teramat Mulia Raja Muda Selangor Tengku Amir Shah (kiri) berkenan menerima cek cura disampaikan Pegawai Kewangan Negeri Dato' Dr Ahmad Fadzli Ahmad Tajuddin (kanan) dalam majlis penyerahan tajaan kejohanan Piala Sultan Selangor (TSSC) 2024 di Istana Alam Shah, Klang pada 10 Jun 2024. Hadir sama Pengurus Pasukan TSSC Tan Sri Abd Karim Munisar (dua, kanan). Foto FIKRI YUSOF ► BERITA MUKA 2



4th SELANGOR AVIATION SHOW 2024

Jumpa anda di sana!

“Sertai **Pameran Penerbangan Selangor** yang ke-4, acara utama di mana pemain industri penerbangan dan aeroangkasa global dan tempatan akan bertemu”

12 – 14 September 2024
Skypark Regional Aviation Centre,
Selangor, Malaysia



@selangoraviationshow @SelAviationShow
selangoraviationshow.com

Hari raya Aidiladha 17 Jun

SHAH ALAM - Umat Islam di Malaysia menyambut Aidiladha pada 17 Jun, kata Penolong Setiausaha Majlis Raja-Raja Datuk Mohd Aseral Jusman.

Beliau yang menyempurnakan titah perintah Yang di-Pertuan Agong selepas diperkenan Duli-Duli Yang Maha Mulia Raja-Raja melalui pengumuman pada 7 Jun mengisytiharkan 1 Zulhijjah 1445 Hijrah pada 8 Jun.

"Maka saya bagi pihak Penyimpan Mohor Besar Raja-Raja Malaysia dengan ini mengisytiharkan bahawa 1 Zulhijjah 1445 Hijrah ialah pada 8 Jun 2024 Masihi.

"Oleh yang demikian, hari raya Korban (10 Zulhijah) bagi negeri-negeri di seluruh Malaysia ialah pada hari Isnin, 17 Jun 2024 Masihi," katanya seperti dilapor Bernama.

Bantu keluarga pelajar maut

SHAH ALAM - Dato' Menteri Besar Dato' Seri Amirudin Shari mengarahkan bantuan segera dihulur kepada keluarga dua pelajar yang maut akibat keracunan makanan di sebuah sekolah di Gombak.

Beliau memberitahu Kerajaan Negeri melalui jabatan pendidikan dan jabatan kesihatan (JKNS) sedang menjalankan siasatan terperinci.

"Saya rakamkan takziah kepada keluarga mangsa dan saya telah arahkan agar bantuan diberi kepada keluarga," katanya di Facebook pada 11 Jun.

Pelajar lelaki berusia 17 tahun dan kanak-kanak perempuan berumur dua tahun dipercayai maut akibat keracunan makanan yang dibawa dari sebuah sekolah agama di Gombak.

Remaja tersebut menjamah makanan yang dibawa ibunya dari sekolah tersebut pada 8 Jun manakala mangsa kedua makan juadah yang dibawa bapanya, pengawal keselamatan sekolah itu pada hari sama.

JKNS memaklumkan seramai 82 daripada 247 orang mengalami gejala keracunan makanan selepas memakan hidangan itu.

Islam perkukuh perpaduan, identiti

SHAH ALAM - Duli Yang Maha Mulia Sultan Selangor menyeru umat Islam memahami dan menghayati khutbah Jumaat pada 7 Jun yang menekankan perpaduan dalam kepelbagaian agama dan kaum.

Sultan Sharafuddin Idris Shah Alhaj juga mengingatkan tanggungjawab umat Islam untuk memastikan perpaduan, keharmonian dan kestabilan negara terus kukuh berdasarkan prinsip agama.

"Ke arah itu, umat Islam hendaklah berjemaah dalam melaksanakan ibadah kepada Allah SWT agar dapat melahirkan perpaduan dan persepakatan berlandaskan Islam dan iman yang satu.

"Malaysia adalah negara yang sangat unik kerana dihuni penduduk pelbagai agama, bangsa dan etnik. Islam agama bagi persekutuan, namun penduduknya bebas mengamalkan kepercayaan masing-masing.

"Kebebasan ini membentuk perpaduan nasional yang kukuh antara kaum dan pembentukan identiti bangsa Malaysia," menurut kenyataan di Facebook Selangor Royal Office.

Baginda bertitah Islam sebagai cara hidup yang syumul menyediakan pedoman lengkap berkaitan hukum, undang-undang, peradaban dan tatasusila umat Islam bersama bukan Islam.

Tegas Baginda, prinsip utama adalah melayani semua sama rata melainkan beberapa aspek, malah ia bertepatan sabda Rasulullah SAW dalam riwayat daripada Safwan bin Sulaim Radhiallahuanhu.

"Islam secara umumnya memandu manusia dalam kehidupan. Berpandukan kepada ajaran agama, manusia dapat mengetahui yang mana benar dan mana yang salah.

"Islam mengandungi prinsip yang tetap lagi tegas seperti yang dalam surah al-Kafirun ayat 6, yang bermaksud: 'bagi kamu agama kamu dan bagi-ku agamaku,'" menurut kenyataan itu.

Tiket serendah RM10

RM1.8 juta taja Piala Sultan Selangor

Oleh **SHEEDA FATHIL**

KLANG - Duli Yang Maha Mulia Sultan Selangor Sultan Sharafuddin Idris Shah Alhaj berkenan menerima tajaan kira-kira RM1.8 juta sempena Piala Sultan Selangor (TSSC) 2024 yang dijadual berlangsung di Stadium Merdeka, Kuala Lumpur pada 17 Ogos.

Kerajaan Negeri yang diwakili Pegawai Kewangan Dato' Dr Ahmad Fadzli Ahmad Tajuddin menyerahkan tajaan bernilai RM1 juta kepada Baginda yang diiringi Duli Yang Teramat Mulia Raja Muda Selangor Tengku Amir Shah

di Istana Alam Shah di sini.

Penganjur TSSC turut menerima tajaan tujuh anak syarikat Kerajaan Negeri antaranya Menteri Besar Selangor (Pemerbadanan) berjumlah RM200,000.

Permodalan Negeri Selangor Berhad, Worldwide Holdings Berhad dan KDEB Waste Management masing-masing menyumbang RM100,000.

Kumpulan Semesta Sdn Bhd, Syarikat Pengurusan Air Selangor Sdn Bhd dan Syarikat Koridor Utiliti Selangor masing-masing menaja RM50,000.

Syarikat pembinaan dan pembangunan hartanah Kumpulan Tanjung

Balai menaja sebuah kereta Honda City sebagai hadiah cabutan bertuah besar untuk tahun ketiga berturut-turut.

Pengerusi dan Pengurus Pasukan TSSC Tan Sri Abd Karim Munisar dalam sembah ucapan turut berterima kasih kepada semua penaja.

"Sungguhpun keadaan ekonomi lebih baik berbanding ketika pandemik Covid-19 namun kelembapan ekonomi masih terasa dan usaha untuk merencanakan TSSC 2024 agak mencabar. Keadaan ini menyebabkan beberapa syarikat korporat terpaksa menarik diri sebagai penaja," katanya.

Lebih 30,000 peniaga daftar PLATS

SHAH ALAM - Seramai 30,781 peniaga berdaftar dengan Platform Selangor (PLATS) setakat 31 Mei untuk mengembangkan perniagaan seterusnya memperluas capaian pasaran.

Dato' Menteri Besar memberitahu program yang diperkenalkan pada 2020 berhasil memberi manfaat kepada puluhan ribu usahawan terutama kategori perusahaan mikro, kecil dan sederhana (PMKS).

"PLATS menjadi respon segera ketika kita berdepan Perintah Kawalan Pergerakan yang membuatkan peniaga terutama PMKS terkesan kini berhasil membantu kelangsungan usahawan kategori ini.

"Dengan (berdaftar) dalam program seperti ini akan memberi peluang kepada negeri untuk merencana dan meneruskan usaha pemerikasaan penaja.

"Kita mahu perkasa penaja bukan dengan langkah populis. Kita perkenal dan besarkan perniagaan mereka," kata Dato' Seri Amirudin Shari ketika melancarkan logo PLATS Biaya di sini pada 5 Jun.

Beliau menjelaskan pentadbirannya melihat secara keseluruhan aspek pemerikasaan usahawan bagi memastikan mereka terus berdaya saing termasuk mendepani ekonomi digital.

Jambatan baharu siap Jun 2026

SHAH ALAM - Projek jambatan baharu yang menghubungkan Sungai Air Tawar di Sabak Bernam ke Hutan Melintang, Perak dijadual siap pada Jun 2026, kata EXCO kemajuan desa.

Datuk Rizam Ismail menjelaskan pembinaan sepanjang 2.8 kilometer yang menelan kos RM219 juta kini mencapai tahap 28 peratus sejak dilaksanakan pada tahun lalu.

"Saya berkesempatan melawat dan melihat sendiri kemajuan serta memantau projek pembinaan Jambatan Sungai Air Tawar ke Hutan Melintang pada 4 Jun lalu.

"Saya diberi penerangan perjalanan projek oleh wakil Jabatan Kerja Raya dan pemaju Meranti Budiman Sdn Bhd. Setakat hari ini, prestasi projek melepasi 28 peratus kemajuan," katanya.

Rizam turut membangkitkan isu setempat berkait keselamatan penduduk sepanjang proses binaan tersebut selain meminta pemaju menyediakan peluang pekerjaan kepada anak tempatan.

"Semoga pembinaan ini siap mengikut waktu yang ditetapkan seterusnya memberi kemudahan dan kelebihan sosioekonomi kepada DUN Sungai Air Tawar," katanya.

IMBAS DI SINI
akhbar digital minggu lepas

selangor
Pelaburan negeri naik 40 perat

selangor
Google melabur RM9.4 bilion



LUNCUR... Dato' Menteri Besar Dato' Seri Amirudin Shari (tengah) bersama EXCO Keusahawanan Najwan Halimi (dua, kanan), Ketua Pegawai Eksekutif Menteri Besar Selangor (Pemerbadanan) atau MBI Saipolyazan M Yusop (dua, kiri), Ketua Pegawai Eksekutif Yayasan Hijrah Selangor Dato' Mearia Hamzah (kiri) dan Ketua Tanggungjawab Sosial dan Komunikasi Korporat MBI Ahmad Azri Zainal Nor memegang plakad ketika melancarkan logo PLATS Biaya di bangunan pentadbiran negeri, Shah Alam pada 5 Jun. Foto AHMAD ZAKKI JILAN

Tapir Malaya ikon alam sekitar

Peliharaan generasi hidupan liar

Oleh FITRI HAZIM HAZAM

HULU SELANGOR - Duli Yang Teramat Mulia (DYTM) Raja Muda Selangor berkenan melancarkan Ikon Alam Sekitar Negeri iaitu Tapir Malaya di Pusat Konservasi Tapir Sungai Dusun di sini.

Tengku Amir Shah juga berkenan menyempurnakan perasmian pada 8 Jun selain menanam pokok Rambutan Pacat, melepas Burung Kuang Raya dan melawat kandang haiwan ikon tersebut.

Menurut EXCO alam sekitar, pemilihan Tapir Malaya yang dilahirkan di situ pada 12 Februari dan dinamai Bumi menjadi simbolik generasi hidupan liar yang dilindungi dan disayangi.

"Bumi anak tapir pertama lahir pada tahun ini. Bumi akan menjadi wajah utama dalam kempen, program dan siri pendidikan berkaitan kesedaran alam sekitar," kata Jamaliah Jamaluddin.

Pelancaran tersebut dihadiri Orang Kaya Maha Bijaya Hulu Selangor Raja Dato' Muzaffar Raja Redzwa, EXCO

Pelancongan Dato' Ng Suee Lim dan wakil rakyat Kuala Kubu Bharu Pang Sock Tao.

Jamaliah menjelaskan tapir memainkan peranan penting dalam ekosistem untuk memupuk kesedaran dalam kalangan masyarakat supaya berusaha memelihara spesies haiwan tersebut dan alam sekitar.

"Ia spesies unik dan melambangkan kekayaan kepada sumber biodiversiti di negeri ini," katanya sambil menambah ada lapan tapir dijaga Jabatan Perlindungan Hidupan Liar dan Taman Negara di situ.

Larangan lepas ikan spesies asing

HULU LANGAT - Enakmen melarang pelepasan ikan asing bakal dikuat kuasa pada tahun ini sebagai langkah memelihara sungai dan spesies tempatan, kata EXCO Pertanian Ir Izham Hashim.

Beliau berkata undang-undang itu melibatkan pembuangan ikan antaranya jenis bandaraya, baung ekor merah dan keli afrika yang dikategori sebagai pemangsa sekali gus mengancam habitat.

Katanya, kajian Universiti Kebangsaan Malaysia (UKM) dua tahun lalu mendapati ikan bandaraya menebuk

tebing untuk bertelur yang boleh menyebabkannya runtuh manakala sungai jadi cetek.

"Isu perlu diatasi segera bagi melindungi sumber protein negeri. Cada-nagan enakmen dibawa ke Majlis Mesyuarat Kerajaan Negeri dan berada dalam fasa akhir," katanya.

Beliau berucap ketika merasmikan program Pemuliharaan Sumber Perikanan Darat: Memburu Ikan Bersama Komuniti di Denai Sungai Kebangsaan berhampiran UKM pada 9 Jun.

Lebih 700 kilogram ikan bandaraya

ditangkap 116 pemburu mulai jam 7 hingga 11 pagi dalam program tersebut.

Ir Izham memberitahu pihaknya bekerjasama dengan Jabatan Perikanan termasuk menyalur insentif kepada pihak yang menangkap ikan asing bagi membantu usaha menjaga populasi ikan lain.

"Ikan yang ditangkap diproses menjadi makanan ikan lain. Jadi, kita juga akan sumbang mesin untuk kerja pemrosesan," katanya yang melepas 10,000 benih ikan lampam ke sungai berkenaan.

Saran KPKT sedia dana, geran segera

SHAH ALAM - Badan pengurusan bersama (JMB) dan perbadanan bersama (MC) kediaman strata perlu diberi dana atau geran tinggi supaya mampu menyelenggara kemudahan asas penduduk.

EXCO Perumahan Borhan Aman Shah berkata menerusi langkah itu, keperluan penduduk antaranya lif, sistem saliran serta infrastruktur lain dapat berfungsi lebih baik di samping menyediakan latihan berkata kepada pentadbir bangunan.

"Ini antara cadangan yang kita kemukakan kepada Kementerian Perumahan dan Kerajaan Tempatan (KPKT) supaya mereka dapat meneliti semula Akta 757 dengan mengambil kira isu kebajikan ahli JMB, MC.

"Kajian semula ini penting untuk memastikan undang-undang dan peraturan sedia ada terus relevan dan efektif dalam mengurus cabaran baharu," katanya pada 12 Jun.

Tawar 3,000 unit rumah Smart Sewa

SHAH ALAM - Lebih 3,000 unit Rumah Selangorku bawah Skim Smart Sewa akan disediakan bagi membantu pasangan muda yang baharu berkahwin menjelang 2026.

EXCO perumahan berkata inisiatif berkenaan merupakan strategi pentadbiran negeri bagi dalam memastikan rakyat negeri ini mampu memiliki kediaman sendiri.

"Menerusi skim ini, pasangan baharu mendirikan rumah tangga boleh menyewa selama lima tahun dengan harga berpatutan. Ini bantu mereka memulakan hidup baharu.

"Selepas tempoh itu, 30 peratus duit bayaran sewa mereka akan diguna sebagai deposit untuk belian Rumah Idaman atau Rumah Harapan," kata Borhan Aman Shah pada 12 Jun.

JKNS siasat punca keracunan makanan

SHAH ALAM - Bihun goreng dan telur mata yang dibekal pengendali luar disyaki punca keracunan makanan di sebuah sekolah agama di Gombak hingga mengakibatkan kematian dua pelajar.

Pengarah Jabatan Kesihatan Negeri Selangor (JKNS) memberitahu sampel makanan telah dihantar ke Makmal Kesihatan Awam Kebangsaan di Sungai Buloh bagi memastikan punca sebenar.

Dr Ummi Kalthom Shamsudin menjelaskan 247 individu terdedah kepada makanan itu tetapi hanya 82 orang mengalami gejala antaranya cirit-birit, sakit perut, demam, muntah dan loya.

Katanya, JKNS giat menyiasat bagi mengesan kes baharu kejadian yang berlaku dalam program Kemahiran Amal Islami peringkat daerah melibatkan 30 sekolah rendah pada 8 Jun.

Rumpun Selangor Petaling 19-21 Jun

SABAK BERNAM - Program Gagasan Rumpun Selangor edisi keempat diteruskan ke daerah Petaling pada 19 hingga 21 Jun, kata EXCO Perpaduan Datuk Rizam Ismail.

Menjelaskan acara itu menampilkan kelainan bagi memenuhi keperluan penduduk bandar, beliau berkata Duli Yang Teramat Mulia Raja Muda Selangor Tengku Amir Shah mencemar duli untuk bertemu rakyat.

"Pengisian program berasaskan kebudayaan selain ruai disediakan untuk berkongsi maklumat termasuk bantuan dan peluang kerja," katanya dalam program Minggu Perpaduan 2024 peringkat negeri di sini pada 9 Jun.

Setakat ini, program sama telah berlangsung di Hulu Selangor, Hulu Langat dan Sepang. Sebanyak RM4.5 juta dipe-runtuk dalam belanjawan tahun ini bagi menjayakan program berkenaan.

Selangor jadi pusat industri kreatif

PETALING JAYA - Peruntukan disediakan setiap tahun untuk menganjurkan program seni dan budaya seiring hasrat mengangkat Selangor sebagai pusat industri kreatif.

Menurut EXCO pelancongan, agensi seperti Menteri Besar Selangor (Pemerbadanan) atau MBI dan Tourism Selangor menyokong usaha itu selain mengetengah bakat tempatan.

"Festival Reka Bentuk dan Kraf (Tukang) 2024 anjuran Tourism Selangor antara contoh acara yang bagus untuk memelihara seni dan warisan. Program seperti ini juga menarik pelancong.

"MBI dan Tourism Selangor juga menyokong artis tempatan melalui pemberian dana yang ada untuk menonjolkan bakat seperti Festival Tukang di masa akan datang," kata Dato' Ng Suee Lim.

Menutup festival di TheSpine @ PJKita di sini pada 9 Jun, beliau berkata Kerajaan Negeri juga memperluas program mengasah bakat artis tempatan melalui pihak berkuasa tempatan (PBT).

"Negeri galakkan anak muda berbakat menghubungi PBT melalui bahagian jawatankuasa pelancongan mengikut kawasan masing-masing bentang karya serta produk mereka untuk diteliti. Pelbagai institusi pengajian tinggi juga menyokong bakat seni," katanya.

Usaha pupuk perpaduan anak muda

SABAK BERNAM - Penganjuran Minggu Perpaduan 2024 memupuk semangat harmoni dalam kalangan masyarakat khususnya golongan muda, kata EXCO Perpaduan Datuk Rizam Ismail.

Beliau memberitahu kelompok tersebut berpeluang melibatkan diri dalam pelbagai kegiatan antaranya sukaneka, kebudayaan dan pendidikan sekali gus merapatkan hubungan silaturahim.

"Pasti masyarakat khususnya anak

muda memerlukan program seperti ini. Kita sokong terutama dibuat di luar bandar," katanya semasa merasmikan program itu di Dewan Seri Nakhoda di sini pada 9 Jun.

Menurut timbalan ketua pengarah (pengarah perancangan strategik) Jabatan Perpaduan Negara dan Integrasi Nasional, penganjuran acara di luar bandar memastikan penduduk tidak tercicir.

"Biasanya program seperti ini dianjurkan di bandar tetapi kali ini memilih Sabak Bernam kerana ingin menyemarakkan elemen perpaduan dalam kalangan masyarakat berbilang agama dan kaum.

"Sambutan menggalakkan dan akan diteruskan di kawasan bandar dan luar bandar supaya dapat meningkatkan semangat kekitaan," kata Mohd Fardhi Ahmad lagi.

U-PLATS bimbing usahawan

Jualan sayur naik 50 peratus

Oleh **SUHAILA SHAHRUL ANNUAR**

SHAH ALAM - Mulanya cuma menaja di kaki lima, peniaga B Kala Rani kini berupaya mengembang perniagaan sayur-sayuran organik di media sosial sekali gus meningkatkan pendapatan bulanan.

Peserta program Latihan Pembangunan Usahawan Platform Selangor (U-PLATS) berusia 43 tahun itu mengakui kemahiran dalam pendigitalan membantunya hingga meraih tambahan hampir 50 peratus.

Katanya, perniagaan bersama suami N Rajah, 54, di pasar moden Taman Ehsan, Gombak kian dikenali hasil promosi menerusi aplikasi TikTok yang meraih

kira-kira 50,000 tontonan.

"Dulu, saya tidak pernah guna media sosial untuk promosi perniagaan tetapi sekarang dapat tarik pelanggan dari situ. Dulu, pendapatan bersih RM1,200 kini boleh cecah RM2,500 sebulan.

"U-PLATS beri jalan untuk majukan perniagaan dan meluaskan pasaran. Mereka ajar cara mahu promosi dan tambah pendapatan selain kaedah kembangkan perniagaan," katanya.

Menyertai U-PLATS pada September tahun lalu, beliau merujuk kemahiran komunikasi, media sosial, keusahawanan, e-dagang dan penciptaan kandungan yang diketipnya dalam program itu.



Kala Rani yang mula berniaga pada 2021 sekitar Selayang selepas berhenti sebagai guru tadika menjual lebih 15 jenis sayuran dan menawarkan khidmat penghantaran pada setiap Sabtu.

"Kami juga membuat penghantaran sayur setiap Sabtu ke kawasan lain seperti Ampang, Sungai Buloh dan Petaling Jaya selepas perniagaan saya semakin dikenali.

"Peniaga yang mahu kembangkan perniagaan patut sertai U-PLATS kerana ia sangat membantu dan berhasil. Jika mahu perubahan, kita perlu berusaha mencari penyelesaian," katanya.

Inisiatif peliharaan khazanah alam

HULU SELANGOR - Kerajaan Negeri sentiasa memastikan khazanah dan sumber alam di Selangor terus dipelihara secara mampan, kata EXCO Alam Sekitar Jamaliah Jamaluddin.

Beliau memberitahu pelbagai inisiatif dijalankan bagi menangani perubahan iklim termasuk aspek penguatkuasaan, program pemantauan, program pendidikan dan kesedaran alam sekitar.

Menurutnya, inisiatif lain antaranya penubuhan Pusat Adaptasi Perubahan Iklim Selangor, pengekalan kawasan liputan hijau tidak kurang 30 peratus

dan projek penanaman 11 juta pokok.

"Usaha lain adalah pembangunan Dasar Perubahan Iklim Selangor, projek pemasangan panel solar di bangunan Kerajaan Negeri dan program Geran Kecil Alam Sekitar.

"Kerajaan Negeri sentiasa mengalu-alukam penglibatan jabatan dan agensi kerajaan, badan bukan kerajaan, korporat dan individu dalam program berterus alam sekitar," katanya pada 8 Jun.

Jamaliah juga memaklumkan Kerajaan Negeri memberi tumpun kepada pembangunan Pusat Konservasi Tapir

Sungai Dusun sebagai pusat ekopelancongan baharu di negeri ini.

Katanya, pembangunan bawah Rancangan Tempatan Majlis Daerah Sabak Bernam Selangor 2035 dan Rancangan Tempatan Majlis Daerah Hulu Selangor 2035 bertujuan memacu industri pelancongan.

Beliau berkata Menteri Besar Selangor (Pemerbadanan) menunaikan tanggungjawab sosial korporat (CSR) menaik taraf kemudahan manakala Perbadanan Kemajuan Pertanian Selangor menyumbang makanan.

| WAKTU SOLAT | 13 - 19 JUN 2024 6 - 12 ZULHIJAH 1445 | Hulu Selangor, Gombak, Petaling, Shah Alam, Hulu Langat dan Sepang | | | | | | | Klang dan Kuala Langat | | | | | | | Sabak Bernam dan Kuala Selangor | | | | | | |
|-------------|--|--|-------|--------|-------|------|---------|-------|------------------------|-------|--------|-------|------|---------|-------|---------------------------------|-------|--------|-------|------|---------|-------|
| | | Imsak | Subuh | Syuru' | Zuhur | Asar | Maghrib | Isyak | Imsak | Subuh | Syuru' | Zuhur | Asar | Maghrib | Isyak | Imsak | Subuh | Syuru' | Zuhur | Asar | Maghrib | Isyak |
| 13 Khamis | | 5:41 | 5:51 | 7:03 | 1:16 | 4:42 | 7:25 | 8:41 | 5:41 | 5:51 | 7:05 | 1:17 | 4:42 | 7:25 | 8:41 | 5:42 | 5:52 | 7:05 | 1:18 | 4:44 | 7:28 | 8:43 |
| 14 Jumaat | | 5:41 | 5:51 | 7:04 | 1:16 | 4:42 | 7:25 | 8:41 | 5:42 | 5:52 | 7:05 | 1:17 | 4:42 | 7:25 | 8:41 | 5:42 | 5:52 | 7:05 | 1:19 | 4:44 | 7:28 | 8:44 |
| 15 Sabtu | | 5:41 | 5:51 | 7:04 | 1:17 | 4:42 | 7:26 | 8:41 | 5:42 | 5:52 | 7:05 | 1:17 | 4:43 | 7:26 | 8:41 | 5:42 | 5:52 | 7:05 | 1:19 | 4:45 | 7:28 | 8:44 |
| 16 Ahad | | 5:41 | 5:51 | 7:04 | 1:17 | 4:43 | 7:26 | 8:42 | 5:42 | 5:52 | 7:05 | 1:17 | 4:43 | 7:26 | 8:42 | 5:42 | 5:52 | 7:05 | 1:19 | 4:45 | 7:28 | 8:44 |
| 17 Isnin | | 5:41 | 5:51 | 7:04 | 1:17 | 4:43 | 7:26 | 8:42 | 5:42 | 5:52 | 7:05 | 1:18 | 4:43 | 7:26 | 8:42 | 5:42 | 5:52 | 7:05 | 1:19 | 4:45 | 7:29 | 8:44 |
| 18 Selasa | | 5:42 | 5:52 | 7:04 | 1:17 | 4:43 | 7:26 | 8:42 | 5:42 | 5:52 | 7:06 | 1:18 | 4:43 | 7:26 | 8:42 | 5:43 | 5:53 | 7:06 | 1:20 | 4:45 | 7:29 | 8:44 |
| 19 Rabu | | 5:42 | 5:52 | 7:05 | 1:17 | 4:43 | 7:27 | 8:42 | 5:43 | 5:53 | 7:06 | 1:18 | 4:44 | 7:27 | 8:42 | 5:43 | 5:53 | 7:06 | 1:20 | 4:46 | 7:29 | 8:45 |



LUPUS... EXCO Pertanian Ir Izham Hashim (tiga, kiri) bersama peserta program Pemuliharaan Sumber Perikanan Darat: Memburu Ikan Bersama Komuniti di Denai Sungai Kebangsaan, Hulu Langat pada 9 Jun. Foto NUR ADIBAH AHMAD IZAM


Perkasa industri kreatif

Geran RM60,000 buat penggiat seni

Oleh **FITRI HAZIM HAZAM**

PETALING JAYA - Tourism Selangor menyalur geran RM60,000 kepada enam penggiat seni bagi memperkasa hab industri kreatif di negeri ini, kata EXCO Pelancongan Dato' Ng Suee Lim.

Beliau memberitahu mereka dipilih daripada 30 penyertaan yang dihantar pada Disember melalui penghasilan seni dan kraf selaras tema iaitu ekonomi kitaran atau circular economy.



Katanya, pameran tiga hari sempena Festival Reka Bentuk dan Kraf 2024 (Tukang) edisi kedua mulai 7 Jun bertujuan memperkasa bakat seni tempatan selain merencanakan industri pelancongan.

Gembira dengan penglibatan ramai anak muda, beliau percaya keunikan hasil seni yang diketengah artis tempatan mampu menjana ekonomi selain menarik minat pelancong ke Selangor.

"Pelbagai hasil seni dan kraf artis berbakat dipaparkan antaranya Wayang Robot oleh Ahnaf Hakimi dan

Scaling Up Scraps oleh Syiborisyd dan Aruznadi," katanya pada 9 Jun.

Pagar 2tt oleh Parti Design Awangan, Deru Arus (Jamil Zakaria), Dung Beetle-A Participatory 'Dirt' Exploration (Cheng Yen Peng) serta The Light of All Things (Khabir Roslan) turut memenangi geran itu.

Festival di The Spine @ PJKita anjuran Tourism Selangor dengan kerjasama Rantai Art turut menampilkan kumpulan muzik tempatan antaranya Daliliyana, Kingsley Chen dan Lorita Nyepit.

Lebih 2,000 pengunjung hadir acara yang meriah dengan aneka jualan makanan, minuman, hasil seni dan kraf.

Faisal perlu rehat enam bulan

SHAH ALAM - Pemain Selangor FC Faisal Halim memerlukan masa sekurang-kurangnya enam bulan untuk pulih kecederaan akibat serangan simbahan asid.

EXCO Sukan Najwan Halimi menjelaskan tonggak pasukan kebangsaan itu dilihat bersemangat menjalani rawatan susulan selain yakin proses pemulihan dapat dipercepat.

"Faisal kini berehat dan menjalani rawatan susulan. Semangatnya cukup kuat dan kemungkinan proses pemulih-

han dapat dipercepatkan.

"Selangor FC memaklumkan mungkin ambil masa enam bulan untuk pulih tapi kita doakan mudah-mudahan beliau dapat sembuh lebih awal," katanya pada 6 Jun. Beliau juga menambah Faisal mengalami trauma akibat serangan berkenaan tetapi dibantu pihak bertanggungjawab.

Sementara itu, Ketua Pegawai Eksekutif Selangor FC Dr Johan Kamal Hamidon berkata Faisal masih belum boleh

melakukan aktiviti kecergasan berat susulan luka kecederaan dialami belum pulih sepenuhnya.

Menurutnya luka di beberapa bahagian badan pemain sayap kebangsaan itu masih basah selain kekuningan seperti bernanah.

"Saya ada melawat beliau minggu lepas dan dapat lihat bahagian luka masih lagi basah dan berwarna kekuningan, tetapi saya tidak pasti itu adalah nanah atau sebaliknya," katanya.

Bantuan cengkeram motor hingga 30 Jun

SHAH ALAM - Permohonan bantuan bayaran pendahuluan pembelian motosikal untuk pekerja BikeCare-1000 fasa dua dibuka sehingga 30 Jun.

EXCO Sumber Manusia V Papparaidu berkata borang permohonan program khusus untuk warga Selangor itu boleh diperolehi dan dihantar ke pejabat Unit Pemberdayaan Pekerja Selangor (UPPS), tingkat lima bangunan pentadbiran negeri.

"Pemohon perlu mematuhi syarat yang ditetapkan iaitu berusia 18 tahun ke atas, memiliki lesen motosikal yang sah dan tidak disenarai hitam Pusat Sistem Maklumat Rujukan Kredit (CCRIS).

"Setiap permohonan perlu disertakan dengan salinan kad pengenalan pemohon, salinan kad pengenalan penjamin (keluarga), salinan penyata bank, salinan lesen motosikal dan salinan penyata gaji dua bulan terkini," katanya pada 11 Jun.

Tawar 1,500 ayam di jualan murah

SHAH ALAM - Dewan Undangan Negeri (DUN) Kuala Kubu Baharu menawarkan 1,500 ekor ayam dalam program Jualan Ehsan Rahmah (JER) mega sempena Aidiladha di Pusat Khidmat DUN itu pada 15 Jun.

Selain ayam, wakil rakyatnya Pang Sock Tao memberitahu sebanyak 600 kampil beras, 144 botol minyak, 600 papan telur, 400 pek ikan dan 400 pek daging turut disediakan kepada pengunjung.

"Berita baik untuk penduduk DUN Kuala Kubu Baharu. Jualan Ehsan Rahmah Madani Mega Aidiladha DUN Kuala Kubu Baharu diadakan pada Sabtu.

"Terdapat potongan harga kaw kaw menanti anda! Ayuh, datanglah beramai-ramai!" katanya di Facebook pada 10 Jun.

Saringan percuma cegah barah

SHAH ALAM - Golongan wanita sekitar Dewan Undangan Negeri (DUN) Kampung Tunku berpeluang mendapatkan saringan virus papiloma manusia (HPV) secara percuma pada 13 Julai.

Wakil rakyatnya berkata saringan bagi mengesan risiko barah pangkal rahim bermula 10 pagi hingga 3 petang di Dewan Serbaguna Majlis Bandaraya Petaling Jaya SS3/14.

"Barah pangkal rahim boleh dirawat dengan pengesanan awal. Dapatkan saringan anda. Ia mudah, tidak menyakitkan dan sangat efektif," kata Lim Yi Wei di Facebook yang turut mengingatkan peserta untuk membawa telefon bimbit dan kad pengenalan.

Menurutnya, pendaftaran program anjuran Pusat Wanita Berdaya DUN Kampung Tunku dengan kerjasama beberapa agensi menerusi pautan forms.gle/AKkks-3dVLLZgV9RK6

Bangunkan ekonomi Sabak Bernam

SABAK BERNAM - Kawasan Pembangunan Sabak Bernam (SABDA) yang terkandung dalam Rancangan Selangor Pertama (RS-1) bakal mengubah landskap daerah berkenaan.

Ketua tanggungjawab sosial korporat dan komunikasi korporat Menteri Besar Selangor (Pemerbadanan) berkata SABDA melibatkan sektor perikanan, pertanian dan pelancongan akan memberi tempas kepada ekonomi selain demografi penduduk.

"SABDA akan merubah daerah ini. Mengikut jabatan statistik, Sabak merupakan kawasan paling tua. Bukan tua usia tetapi dihuni warga emas.

"Dengan adanya pembangunan SABDA, kawasan ini mencipta peluang kerjaya dan ekonomi sekali gus menarik kedatangan generasi muda," kata Ahmad Azri Zainal Nor.

Pasar tani kekal di pekarangan stadium

SHAH ALAM - Pasar Tani Stadium Shah Alam di Seksyen 13 di sini masih beroperasi setiap Ahad meski projek pembangunan semula Kompleks Sukan Shah Alam (KSSA) berjalan di kawasan tersebut.

Timbalan Ketua Pengarah (Khidmat Pengurusan) Lembaga Pemasaran Pertanian Persekutuan (Fama) Rosilawati Abu Hassan berkata lokasinya dialih sedikit tetapi kekal di pekarangan stadium itu.

"Pasar Tani Stadium Shah Alam yang berada dalam kawasan pembangunan KSSA masih beroperasi dan tidak dihentikan oleh kerajaan Selangor.

"Kita alih sedikit pasar tani ke kawasan baharu tetapi masih di pekarangan stadium seperti yang diarah Menteri Besar Selangor (Pemerbadanan) dan Darul Ehsan Facilities Management Sdn Bhd," katanya seperti dilaporkan Bernama pada 6 Jun.

59,757 usahawan kembang niaga

SHAH ALAM - Yayasan Hijrah Selangor (Hijrah Selangor) meluluskan 89,347 pembiayaan bernilai RM810 juta sejak 2015 hingga kini kepada seramai 59,757 usahawan.

Menurut Ketua Pegawai Eksekutifnya Dato' Mearia Hamzah, bantuan itu bagi memenuhi hasrat untuk melonjakkan golongan berpendapatan rendah kepada kelas menengah melalui perniagaan.

Beliau menjelaskan Hijrah Selangor sentiasa memberi perkhidmatan terbaik untuk melebar peluang golongan kelas menengah.

"Ini bagi memastikan mereka mampu berdaya saing serta mengembangkan perniagaan ke peringkat lebih tinggi," katanya dalam majlis peluncuran logo PLATS Biaya pada 5 Jun.

Kadar baharu tidak lebih 25 peratus

SHAH ALAM - Orang ramai boleh mengemukakan bantahan kadar baharu cukai taksiran kepada Majlis Bandaraya Shah Alam (MBSA) sebelum tempoh akhir pada 14 Jun.

Menjelaskan kadar baharu tidak melebihi 25 peratus, datuk bandarnya berkata penilaian semula dibuat selepas 18 tahun untuk memastikan perkhidmatan kepada rakyat terus efisien.

Menurut Dato' Mohd Fauzi Mohd



Yatim, pihaknya juga sedia bertemu pemilik harta yang membantah kadar baharu itu dalam sesi pendengaran khas yang akan diadakan selepas tempoh bantahan.

"Ada tidak bersetuju dengan kenaikan cukai taksiran tetapi sebenarnya MBSA memerlukan kewangan kukuh dalam memberi perkhidmatan terbaik kepada rakyat.

"Kita memerlukannya (cukai). Kenaikan tidak melebihi 25 peratus daripa-

da cukai lama tetapi kita terima bantahan dan akan panggil pemilik hartanah untuk sesi pendengaran," katanya.

Bermula 9 Mei hingga 6 Jun, MBSA menerima 1,990 bantahan daripada pemilik harta berhubung kadar baharu cukai tersebut yang dikuat kuasa mulai Januari tahun depan.

Kadar itu melibatkan kediaman, perdagangan, perindustrian dan tanah kosong (pertanian), manakala rumah ibadat, sekolah dan premis awam yang bukan bermotif keuntungan menerima pengecualian.

Ada ruang untuk kemuka bantahan

Hampir 40 tahun tidak naik cukai

OLEH SITI ROHAIZAH ZAINAL, SUHAILA SHAHRUL ANNUAR & FITRI HAZIM HAZAM

SHAH ALAM - Lapan pihak berkuasa tempatan (PBT) tidak membuat semakan kadar cukai taksiran antara kira-kira 20 hingga 40 tahun lalu.

Majlis Perbandaran Kajang (MPKj) paling lama tidak menaikkan kadar itu selama 39 tahun sejak 1985, diikuti Majlis Perbandaran Kuala Langat (MPKL) 37 tahun sejak 1987 dan Majlis Perbandaran Selayang (MPS) 32 tahun sejak 1992.

Majlis Bandaraya Subang Jaya (MBSJ) pula tidak menaikkan cukai taksiran selama 32 tahun sejak 1992 bagi kawasan Subang Jaya dan Bandar Sunway. Manakala kawasan USJ, Puchong, Seri Kembangan dan Serdang selama 28 tahun sejak 1996.

Majlis Perbandaran Ampang Jaya (MPAJ) dan Majlis Perbandaran Kuala Selangor (MPKS) pula selama 27 tahun sejak 1997, manakala Majlis Perbandaran Hulu Selangor (MPHS)

28 tahun sejak 1996.

Majlis Bandaraya Shah Alam (MBSA) pula tidak mengenakan sebarang peningkatan cukai taksiran selama 18 tahun sejak 2006.

Berdasarkan peruntukan Akta Kerajaan Tempatan 1976 (Akta 171), nilai baharu boleh dibuat setiap lima tahun atau dalam tempoh lanjutan yang diputuskan oleh Kerajaan Negeri.

Meski ada cadangan semakan jumlah cukai taksiran, pemilik hartanah boleh membuat bantahan kepada PBT masing-masing mengikut tarikh yang ditetapkan.

Tarikh akhir menghantar bantahan boleh disemak di portal atau media sosial pihak berkenaan. Tarikh bantahan juga dimuatkan dalam notis kepada pemilik.

MPKj sudah menguat kuasa semakan sejak 1 Januari tahun ini tetapi hanya mengenakan bayaran sebanyak 50 peratus daripada kadar kenaikan setiap pemilik. Bayaran kadar penuh akan dikuat kuasa pada tahun depan.

Tarikh akhir bantahan MPS dan MPAJ berakhir pada 31 Mei, sementara MBSJ belum menetapkan tarikh.

Tarikh bantahan di PBT lain seperti berikut:

| | |
|-------------|-----------------|
| MBSA | 14 Jun |
| MPKL | 24 Jun |
| MPKS | 1 Julai |
| MPHS | 5 Julai |
| MBDK | 16 Julai |
| MBPJ | 18 Julai |

Pada 30 Mei, Dato' Menteri Besar Dato' Seri Amirudin Shari menjelaskan proses penilaian baharu yang dijalankan PBT penting demi memastikan keberkesanan perancangan bandar.

Menegaskan rumah kos rendah tidak dikenakan kenaikan meski menerima notis itu, beliau berkata semakan tersebut bertujuan mengetahui nilai dan mutu perbandaran sesebuah kawasan.

Katanya, pentadbiran negeri juga akan meneliti pelbagai faktor sebelum memberi kebenaran kepada PBT untuk membuat kenaikan ataupun sebaliknya.

Sesi dengar bantahan MPAJ 24 Jun

SHAH ALAM - Sesi pendengaran membabitkan 12.34 peratus pemegang harta yang membantah nilai baharu pemilikan hartanah di Majlis Perbandaran Ampang Jaya (MPAJ) dijadual pada 24 Jun.

Yang Dipertuanya Dr Ani Ahmad memberitahu sesi tersebut diadakan secara berperingkat sehingga 31 Julai melibatkan 22,352 daripada 181,144 pemegang harta di kawasan



pentadbiran MPAJ.

"Panggilan dan jemputan ke sesi mendengar bantahan dihantar melalui surat, e-mel dan sistem pesanan ringkas (SMS) kepada pemilih harta yang membuat bantahan.

"Pemilik harta yang menerima jemputan diminta membuat pengesahan kehadiran melalui pautan yang

dilampirkan bersama jemputan kelak," katanya.

Beliau menjelaskan MPAJ akan membawa kertas pembentangan senarai nilai baharu kepada Kerajaan Negeri selepas sesi pendengaran untuk kelulusan yang dijangka pada September.

Katanya, nilai baharu itu hanya dikuat kuasa melalui pembayaran bil cukai taksiran bermula 1 Januari tahun depan selepas pentadbiran negeri memberi persetujuan.



Borhan (dua, kiri) menyaksikan penyerahan cek cura baik pulih lif daripada Setiausaha Bahagian Perancangan Perumahan KPKT Khalid Mohamed (dua, kanan) kepada Dr Juhari (kiri) sempena program Jalinan Kasih Mesra Rewang Sekampung di Seksyen 26, Shah Alam pada 8 Jun. Foto NUR ADIBAH AHMAD IZAM

Utamakan keselesaan penghuni

RM2.5 juta baiki tiga PPR

Oleh **SOFIA NASIR**

SHAH ALAM - Peruntukan RM2.5 juta disediakan bagi membaiki pulih Projek Perumahan Rakyat (PPR) Kampung Baru Hicom, PPR Kota Damansara dan PPR Seri Kiambang di Serendah, Hulu Selangor.

EXCO Perumahan Borhan Aman Shah berkata tiga PPR tersebut turut menerima tambahan peruntukan bagi penyelenggaraan daripada Kementerian Perumahan dan Kerajaan Tempatan (KPKT) RM1.74 juta.

Menegaskan dana itu bertujuan memastikan penghuni menikmati kehidupan selesa, beliau berkata usaha menambah baik dasar PPR dari semasa ke semasa dipapar dalam Belanjawan Selangor 2024.

"Usaha ini membuktikan keprihatinan kerajaan bagi menayakan hasrat dan harapan rakyat untuk mendiami rumah lebih selesa dan kondusif," katanya di PPR Kampung Baru Hicom di sini.

Beliau memastikan program Jalinan Kasih Mesra PPR Rewang Sekampung pada 8 Jun. Hadir sama Pengarah Eksekutif Lembaga Perumahan dan Hartanah Selangor Dato' Dr Juhari Ahmad.

Borhan turut mengumumkan pe-

runtukan khas RM1.5 juta kepada PPR Kampung Baru Hicom untuk menyelenggara dan penggantian lif bawah program Lif Madani 2.0.

Beliau menambah PPR Kampung Baru Hicom menerima projek tambah baik kemudahan asas seperti ruang legar kedai makan, landskap, kawasan parkir motosikal serta gelanggang futsal.

"Usaha mengukuhkan kerjasama pintar dengan pelbagai pihak terus dipergiat bagi membangunkan PPR ke arah acuan Keluarga Madani," katanya lagi.

Sementara itu, program Rewang Sekampung memberi peluang penduduk merasai pengalaman gotong-royong ala kampung.

Pekerja pembersihan R Chandrakala, 44, mengakui teruja apabila julung kali menyertai kegiatan menyiapkan juadah makanan seperti kenduri untuk 4,000 penduduk.

"Ini pertama kali saya datang rewang dan seronok dapat berkumpul bersama jiran. Selama 10 tahun tinggal di sini, kami tidak pernah ada kegiatan besar seperti ini.

"Saya harap program baik seperti ini dianjurkan selalu, kalau dapat dua kali setahun pun cukup. Kami orang susah, hujung minggu tiada aktiviti apa pun," katanya.

Tingkat keselamatan kanak-kanak

SHAH ALAM - Sekretariat kempen keselamatan kanak-kanak dalam kenderaan ditubuh untuk membangkit kesedaran ibu bapa dan penjaga seterusnya mengelak kes anak tertinggal dalam kenderaan.

EXCO Kebajikan Anfaal Saari memberitahu urus setia kempen itu dianggotai antaranya persatuan taska, jabatan kesihatan, jabatan pendidikan dan Yayasan Warisan Anak Selangor

"Persatuan taska selaku operator akan hubungi ibu bapa jika berlaku kelewatan atau tidak hantar anak ke taska. Amalan saling mengingatkan melibatkan semua pihak perlu diteruskan.

"Untuk fasa berikutnya, kempen melibatkan syarikat swasta atau pusat beli-belah bagi berkongsi mesej kesedaran dengan mengingatkan kehadiran anak dalam kereta," katanya pada 7 Jun.

Menasihati ibu bapa menerap amalan pandang belakang bagi mengelak kes seumpama itu berulang, Anfaal berkata kempen bersepadu melalui media sosial, media massa dan khidmat masyarakat diteruskan.

"Kita tidak mahu kejadian anak tertinggal dalam kenderaan hingga meragut nyawa berulang. Kejadian seperti ini menyebabkan ibu bapa menanggung kesan emosi yang berat," katanya.

SIERRA HIJAUAN
Distinctively IJM

NIKMATI ALAM SEMULA JADI DI TENGAH KOTA

Rumah Berkembar untuk Dijual

Unit Bumiputera

Sierra Ukay Sdn Bhd 200401035353 (673863-K)
Tingkat Bawah, Wisma IJM, Jalan Yong Shook Lin, 46050 Petaling Jaya, Selangor Darul Ehsan.

☎ 019 268 4648 | 🌐 sierrahijauan | 📍 ijmland | 📧 sierrahijauan.my

Fasa 2E Pemaju: Sierra Ukay Sdn Bhd 200401035353 (673863-K) • Tingkat Bawah, Wisma IJM, Jalan Yong Shook Lin, 46050 Petaling Jaya, Selangor Darul Ehsan • Tel: 03-7985 8188 Faks: 03-7952 9848/9091 • Jenis: Rumah Berkembar 2/2 Tingkat dan Rumah Sesebuah 3 Tingkat • No. Lesen Pemaju: 10296/10-2027/1186(A) • Tarikh Sah: 31/10/2023-30/10/2027 • No. Permit Iklan dan Jualan: 10296/10-2026/0205(N)(S) • Tarikh Sah: 28/02/2023-27/02/2026 • Pihak berkuasa yang meluluskan Pelan Bangunan: Majlis Perbandaran Ampang Jaya • No. Kelulusan Pelan Bangunan: MPAJ.BS.KB.740.1/2-11/12-3 • Pegangan Tanah: 99 tahun • Tarikh tamat tempoh: 6 Januari 2114 • Sekatan Keperluan: Tanah ini tidak boleh dipindahkan, dipajak atau ditukar tanpa kelulusan Pihak Berkuasa Negeri • Bebanan Tanah: Tiada • Tarikh dijangka siap: Mac 2026 • Jumlah Unit: 24 (Rumah Berkembar 2/2 Tingkat) • Harga Jualan: RM3,033,600 (Minima) RM3,275,600 (Maksima) • Jumlah Unit: 1 (Rumah Sesebuah 3 Tingkat) • Harga Jualan: RM 4,420,800 (Minima/Maksima) • Diskaun untuk Bumiputera: 7% Fasa 2B Pemaju: Sierra Ukay Sdn Bhd 200401035353 (673863-K) • Tingkat Bawah, Wisma IJM, Jalan Yong Shook Lin, 46050 Petaling Jaya, Selangor Darul Ehsan • Tel: 03-7985 8188 Faks: 03-7952 9848/9091 • Jenis: Rumah Teres 2/2 Tingkat dan Rumah Teres 2 Tingkat • No. Lesen Pemaju: 10296/10-2027/1186(A) • Tarikh Sah: 31/10/2023-30/10/2027 • No. Permit Iklan dan Jualan: 10296/10-2026/0205(N)(S) • Tarikh Sah: 03/03/2023-02/03/2026 • Pihak berkuasa yang meluluskan Pelan Bangunan: Majlis Perbandaran Ampang Jaya • No. Kelulusan Pelan Bangunan: MPAJ.BS.KB.740.1/2-11/12-3 • Pegangan Tanah: 99 tahun • Tarikh tamat tempoh: 6 Januari 2114 • Sekatan Keperluan: Tanah ini tidak boleh dipindahkan, dipajak atau ditukar tanpa kelulusan Pihak Berkuasa Negeri • Bebanan Tanah: Tiada • Tarikh dijangka siap: Mac 2026 • Jumlah Unit: 12 (Rumah Teres 2/2 Tingkat) • Harga Jualan: RM2,046,800 (Minima) RM2,261,800 (Maksima) • Jumlah Unit: 66 (Rumah Teres 2 Tingkat) • Harga Jualan: RM 1,603,980 (Minima) RM2,248,800 (Maksima) • Diskaun untuk Bumiputera: 7% Fasa 2F Pemaju: Sierra Ukay Sdn Bhd 200401035353 (673863-K) • Tingkat Bawah, Wisma IJM, Jalan Yong Shook Lin, 46050 Petaling Jaya, Selangor Darul Ehsan • Tel: 03-7985 8188 Faks: 03-7952 9848/9091 • Jenis: Rumah Berkembar 2/2 Tingkat dan Rumah Sesebuah 3 Tingkat • No. Lesen Pemaju: 10296/10-2027/1186(A) • Tarikh Sah: 31/10/2023-30/10/2027 • No. Permit Iklan dan Jualan: 10296/10-2026/0789(N)(S) • Tarikh Sah: 10/07/2023-09/07/2026 • Pihak berkuasa yang meluluskan Pelan Bangunan: Majlis Perbandaran Ampang Jaya • No. Kelulusan Pelan Bangunan: (09)DLM.MPAJ.BS.KB.740.1/2-11/12-3 • Pegangan Tanah: 99 Tahun • Tarikh Tamat Tempoh: 6 Januari 2114 • Sekatan Keperluan: Tanah ini tidak boleh dipindahkan, dipajak atau ditukar tanpa kelulusan Pihak Berkuasa Negeri • Bebanan Tanah: Tiada • Tarikh dijangka siap: Ogos 2026 • Jumlah Unit: 2 (Rumah Berkembar 3 Tingkat) • Harga Jualan: RM4,124,800 (Minima), RM4,241,600 (Maksima) • Jenis SD3 • Jumlah Unit: 2 (Rumah Berkembar 3 Tingkat) • Harga Jualan: RM3,794,800 (Minima/Maksima) • Jenis SD4 • Jumlah Unit: 12 (Rumah Berkembar 2/2 Tingkat) • Harga Jualan: RM3,297,800 (Minima), RM3,742,800 (Maksima) • Jenis BA2 • Jumlah Unit: 1 (Rumah Sesebuah 3 Tingkat) • Harga Jualan: RM4,878,800 (Minima/Maksima) • Diskaun untuk Bumiputera: 7%

IKLAN INI TELAH DILULUSKAN OLEH JABATAN PERUMAHAN NEGARA

IJM LAND

ANAH SYABIKAT IJM CORPORATION BHD

Tidak duga jadi tetamu Allah

Oleh **ABDUL RAHIM SABRI**
Foto **FIKRI YUSOF**

Usianya sudah 68 tahun tetapi peluang naik haji dijadual pada 2070. Walau sudah cukup simpanan dengan Lembaga Tabung Haji (TH), Yacob Ahmad terpaksa menunggu 46 tahun lagi untuk menunaikan rukun Islam kelima.

Semuanya ini gara-gara silap faham beliau ketika awal-awal membuka akaun simpanan dengan TH. Pesara kerajaan ini mendaftar haji hanya pada 2021 walau akaunnya dibuka lebih 20 tahun lalu.

"Sepatutnya (saya) pergi tahun 2070. Saya fikir tidak mengapa kalau tidak dapat pergi. Tetapi saya dapat (pergi) tahun ini kerana isteri saya. Dia dapat tawaran.

"Tabung Haji tanya (dia) calon mahram? Isteri saya cakap suami saya tidak dapat (tawaran). Saya jadi mahram (selepas permohonan rayuan)," katanya kepada Selangorkini sehari sebelum bertolak ke tanah suci pada 8 Jun.

"Tiba-tiba dapat jadi pergi, seronoknya. Rezeki. Hajat saya termakbul. Rezeki dapat pergi," tambahnya, dengan menjelaskan beliau sebelum ini menyangka diberikan giliran secara automatik ketika mula menabung.

Beliau antara 222 penerima bantuan RM1,000 seorang dalam program Insentif Haji Muassasah yang diserahkan di Batang Kali, Hulu Selangor pada 5 Mei (foto kanan). Peruntukan RM6 juta disediakan untuk 6,000 jemaah haji tahun ini.

Bermula beberapa tahun lepas, insentif RM500 seorang digandakan kepada RM1,000 tahun ini. Jumlah penerima juga ditingkatkan semula kepada enam ribu orang.

Selangor juga bakal menanggung kos perjalanan 36 jemaah daripada keluarga kurang berkemampuan untuk mengerjakan ibadah itu secara percuma tahun ini.

Ia susulan titah Duli Yang Maha Mulia Sultan Selangor Sultan Sharafuddin Idris Shah Alhaj pada 28 April. Justeru RM1.2 juta akan dibelanjakan untuk tujuan itu.



Bilangan jemaah haji Selangor yang bakal mengerjakan ibadah kelima dalam rukun Islam di Makkah pada tahun ini seramai 8,061 orang.

Ringankan kos

Sementara tiga lagi jemaah haji dari Selangor yang diwawancara melahirkan rasa syukur setelah merancang ke Makkah kira-kira 15 tahun lalu. Mereka mendaftar pada 2008 dan 2009.

"Alhamdulillah, setinggi-tinggi syukur dijemput oleh Allah pada usia 51 tahun dan suami pula 60 tahun. Inilah hadiah daripada Allah untuk kami berdua,"

kata Shuhaida Ali Miras @ Abd Shukor dari tanah haram pada 10 Jun.

Menyimpan wang melalui pemotongan gaji setiap bulan dan pergi bersama suami Azhar Md Yusof, kakitangan Majlis Amanah Rakyat (Mara) itu mendaftar pada 2009.

Seorang buruh Amaluddin Ismail, 55, dan pesara guru Azlina Supari, 56, juga membuat potongan pendapatan setiap bulan untuk menyahut lambaian Kaabah.

Dihubungi Selangorkini melalui mesej WhatsApp dari Makkah, mereka menunaikan ibadah fardu ini dengan ditemani oleh pasangan masing-masing.

"Setelah sekian lama menunggu, akhirnya saya dijemput menjadi duyuf ar-Rahman (tetamu Allah)," kata Amaluddin yang mendaftar pada 2008.

Azlina menabung sejak mula bekerja pada usia 25 tahun pada 1993. "Saya sangat berterima kasih kepada suami yang telah mendaftarkan nama saya di TH pada 2009," katanya.

Seperti Yacob, ketiga-tiga jemaah ini menerima insentif RM1,000 daripada Kerajaan Negeri pada majlis yang sama. Jumlah ini digunakan untuk perbelanjaan di tanah suci.

"Syukur dengan insentif kerajaan, kami dapat meringankan kos perbelanjaan di sini. Terima kasih Kerajaan Selangor. Saya dan suami memang anak jati Selangor," jelas Shuhaida.

Yacob pula merancang menghulur sedekah sebagai amal jariahnya. "Bagus (insentif ini). Saya dapat buat perbelanjaan (persiapan). Duit itu juga saya boleh bersedekah, memanjangkan pahala."

Mengenai persiapan, beliau sudah menghadiri kursus haji sebelum mendapat tawaran. "Apabila dapat jawapan (boleh pergi), lagi bersemangat," katanya.

Selain berpandukan bahan kursus dan pengalaman rakan-rakannya, Azlina menambah lagi pengetahuan dengan menonton dari YouTube.

"(Saya) membaca buku-buku rujukan yang dibekalkan oleh TH, selain mengikuti pembelajaran di YouTube. Untuk kelengkapan, (saya) ikut saranan TH dan pengalaman rakan-rakan," katanya.



PERUNTUKAN PROGRAM INSENTIF HAJI MUASSASAH

| Tahun | Bilangan Penerima | Peruntukan (RM) | Catatan |
|-------|-------------------|-----------------|-----------------------------------|
| 2020 | - | - | Pandemik Covid-19 |
| 2021 | - | - | Pandemik Covid-19 |
| 2022 | 3,000 | 1,654.800 | Sumbangan wang tunai dan kit haji |
| 2023 | 3,000 | 1,653.000 | Sumbangan wang tunai dan kit haji |
| 2024 | 6,000 | 6,000,000 | Sumbangan wang tunai |

Sumber Menteri Besar Selangor (Pemerbadanan) atau MBI



Kitab warisan Melayu

Oleh NADIAH ZAMLUS

Foto AHMAD ZAKKI JILAN &
MOHD KHAIRUL HELMY MOHD DIN

Usianya mencecah 400 tahun. Tulisannya bertinta emas, kertasnya dari Eropah. Itulah al-Quran dihasilkan Kesultanan Terengganu, tersimpan rapi sehingga kini.

Kalam itu sebahagian lebih 20 manuskrip klasik Melayu yang dipapar pada Pameran al-Wahyu: Tradisi Keilmuan Islam Alam Melayu sempena Festival Turath Islami Selangor.

Dianjur antara 26 Mei hingga 2 Jun, ia berlangsung di Masjid Sultan Salahuddin Abdul Aziz Shah di Shah Alam (**lihat foto muka 15 dan 16**).

EXCO Hal Ehwal Agama Islam Dr Mohammad Fahmi Ngah yang merasmikan pameran itu teruja melihat manuskrip ratusan tahun dipamer buat kali pertama ketika festival (*foto kanan*).

Kesultanan di pantai timur itu antara kerajaan Islam di alam Melayu paling banyak menghasilkan salinan mashaf al-Quran pada abad ke-19 — ketika pemerintahan Sultan Omar Muazzam Riayat Shah (1839-1876).

Dikenali sebagai Baginda Omar, sultan Terengganu kesembilan lebih memerintah hampir 37 tahun. Baginda juga sultan pertama melantik mufti negeri itu.

Walau tiada surat tauliah rasmi, pelantikan mufti dibuktikan melalui surat wakaf Sultan Omar bertarikh 19 April 1874.

Ketua Pusat Penyelidikan Manuskrip Alam Melayu, Institut Alam dan Tamadun Melayu (ATMA) di Universiti Kebangsaan Malaysia (UKM) berkata tidak dinafikan Istana Terengganu pada abad tersebut aktif menyalin semula kitab suci.

“Sebuah naskhah al-Quran dari Istana Terengganu pernah dihadaikan kepada Istana Selindong Bayu Saiburi, Pattani (selatan Thailand) sebagai pertukaran diplomatik.

“Kesemua hurufnya bertinta emas. (Naskhah ini) masih tersimpan rapi di Muzium al-Quran Narathiwat, Thailand,” kata Ts Dr Ros Mahwati Ahmad Zakaria yang ditugaskan sebagai kurator Pameran al-Wahyu.

Sebuah lagi manuskrip Terengganu disimpan muzium sama turut mengandungi emas. Bezanya ia hanya menggunakan titik-titik emas pada bahagian awal halaman, tengah dan paling belakang al-Quran.

Bukan semata-mata emas yang dibanggakan. Penggunaan bahan berkualiti membolehkan manuskrip ratusan tahun ini bertahan lama. Misalnya, naskhah itu ditulis di atas kertas laid



Sebuah naskhah al-Quran dari istana Terengganu pernah dihadaikan kepada istana di Pattani. Kesemua hurufnya bertinta emas

yang dibawa dari Eropah.

Kertas jenis ini popular di benua tersebut antara abad ke-12 hingga 19. Kertas buatan tangan berwarna putih krim itu mempunyai tekstur garis halus. Sekali gus menjadikannya tampak klasik dan mewah. Sekarang kertas ini digunakan oleh artis.

“Selain kertas, ciri penting pada manuskrip ialah dakwat hitam. Dakwat mashaf lama diperbuat daripada abu tulang haiwan dan gading. Juga ada dakwat dihasilkan daripada jelaga. Sehingga kini ada satu kilang dakwat jelaga yang masih wujud di Indonesia.

Dakwat diadun madu

“Orang dahulu kala, bukan gunakan dakwat hitam itu semata-mata. Sebaliknya ia diadun bersama madu atau getah gajus untuk kekalkan

dakwat pada kertas. Kalau tidak dicampur medium berkenaan, nanti mungkin tulisan pada mashaf akan jadi debu semula,” jelasnya.

Kesultanan lain di Asia Tenggara yang aktif menyalin manuskrip al-Quran antaranya Riau-Lingga (di Sumatera), Sulawesi Selatan (Sulawesi), Banten, Cirebon, Yogyakarta, Surakarta (semuanya di Jawa), Sumbawa, Bima (kedua-duanya di Nusa Tenggara), Bone (Sulawesi), Ternate dan Tidore (kedua-duanya di Maluku).

Sehubungan itu, ada perbezaan seni ragam hias manuskrip kitab suci mengikut kawasan. Al-Quran dari Semenanjung Tanah Melayu, Indonesia dan selatan Thailand ada identiti tersendiri.


Mashaf dari Terengganu lebih banyak dilukis dengan motif ukiran kayu dan seni rumah tempatan. Ia termasuk tebar layar, juga rekaan bertingkat seakan-akan singgahsana istana. Lukisan bunga halus tidak ditinggalkan. Berbeza dengan Pattani, mereka lebih banyak menggunakan motif bunga lebih besar.

Al-Quran dari Jawa pula lebih ketara menggunakan pepohon yang dilukis secara simbolik. Pengkaji mampu menilai asal mashaf hanya melihat ragam hias lukisan birai mengelilingi kertas kitab suci itu.

Ciri-ciri seni ragam hias itu membolehkan pengkaji membezakan al-Quran dari alam Melayu dengan al-Quran Empayar Uthmaniyah di Laut Mediterranean yang berkuasa antara awal abad ke-14 hingga awal kurun ke-20. ▶



- 1 Al-Quran dari Thailand menggunakan motif hiasan bunga lebih besar
- 2 Manuskrip pembuatan sampan dari Muzium Narathiwat, Thailand ini memperincikan bahagian-bahagian sampan
- 3 Kandungan tiga manuskrip ini mengupas ilmu aqidah, fiqah dan tafsir. Dua daripada tiga menggunakan kertas laid dari Eropah
- 4 Kitab abad ke-19 ini mengandungi ilmu teknikal dan bahan diperlukan bagi menghasilkan bilah keris



Semua manuskrip al-Quran klasik dalam Pameran al-Wahyu dibawa dari Muzium al-Quran Narathiwat (Thailand), Perpustakaan Negara Malaysia, ATMA UKM dan koleksi orang persendirian.

Selain manuskrip al-Quran, pameran berkenaan turut mempamerkan kitab fiqah, tauhid, sejarah dan perubatan berbahasa Melayu yang ditulis dengan huruf Jawi.

Koleksi kitab tua itu membuktikan ulama terdahulu mendidik orang Melayu dengan dakwah dan keilmuan Islam.

Ulama hebat

“Pentingnya penemuan ini adalah, pada waktu dahulu, orang Melayu tidak mempunyai pengetahuan bahasa Arab. Apabila naskah ini ditulis ulama dengan tulisan Jawi (bahasa Melayu), ia memberi manfaat kepada keseluruhan masyarakat Melayu,” kata Ros Mahwati lagi.

Salah satunya manuskrip Nazam Kanz Ula

karangan ulama terkenal Terengganu, Tokku Tuan Besar atau nama sebenarnya Saiyid Zainal Abidin al-Aidrus. Dikenali nabam atau nabang dalam tradisi rakyat, nazam itu bacaan puisi atau syair buat junjungan Rasulullah.

Turut dipamerkan Manuskrip Muniyatul Musolli (Cita-cita Orang yang Bersembahyang), karya tokoh ulama tersohor Syeikh Daud al-Fatani, mengulas fiqah solat.

Tidak terhad kepada agama, manuskrip lama berkaitan petua perubatan juga ditemui. Ia menukilkan tentang bahan-bahan akar kayu untuk perubatan.

“Menerusi kitab ini, mereka bukan saja tulis tentang manfaat herba berkenaan. Tetapi cara menggunakannya. Setiap satu langkah ditulis. Begitu teliti. Herba-herba alam Melayu sudah diceritakan sejak dahulu lagi.

“Manfaatnya sehingga kini kita terima. Disebabkan itu sehingga kini di rumah-rumah orang Melayu masih banyak tanaman

herba. Sebab dari dahulu kita sudah tahu manfaatnya,” kata Ros Mahwati.

Sewajarnya masyarakat kita bangga dengan warisan manuskrip lama berkenaan yang sekali gus membuktikan tokoh ulama alam Melayu sama hebat dengan Barat, tambahnya.

“(Sekarang) ini tidak (begitu sikap), mereka ingat buku-buku yang dihasilkan di Barat lebih hebat. Sedangkan sebenarnya kita tidak tahu ada manuskrip lama sebegini. Penulis Melayu sangat canggih dan sistematik, tapi katanya kita tidak secanggih mat salih yang hasilkan kitab lebih menarik.

“Bezanya apa yang mereka tulis atau hasilkan ini berkaitan dengan keperluan pada masa itu. Seperti petua perubatan, syair mahupun seni pembuatan kapal dan meriam,” katanya.

Justeru menyokong Pameran al-Wahyu yang diusahakan Kerajaan Selangor bersama UKM, beliau mencadangkan ia dilaksana lebih kerap. Pameran seperti ini lebih ringkas dan cepat difahami golongan muda kini.

INVEST SELANGOR

THE GOLDEN STATE OF MALAYSIA

25 YEARS



Realisasi Visi Selangor Negeri Emas Malaysia

25 tahun satu perjalanan yang amat panjang. Pelbagai usaha dijayakan bagi mengukuhkan peranan dan fungsi Invest Selangor dalam membangunkan ekonomi Selangor.

Bermula dengan penubuhan Jawatankuasa Petugas Pelaburan Asing bawah Unit Perancang Ekonomi Negeri (UPEN), fungsinya berkembang sehingga tertubuhnya Pusat Pelaburan Negeri Selangor (SSIC Berhad) yang beroperasi pada 1 Jun 1999.

Pada 2015, SSIC Berhad dijenamakan semula kepada Invest Selangor dengan fungsi dan tugas yang lebih luas. Pada tahun itu, bermulalah perjalanan Invest Selangor Berhad (Invest Selangor) meneroka pelbagai bidang hingga tertubuhnya Majlis Teknologi Maklumat dan E-dagang Selangor (SITEC), Perbadanan Ekonomi dan Maklumat Digital Selangor (SIDEK) serta banyak lagi.

Penganjuran Ekspo Antarabangsa Selangor yang kini dikenali sebagai Sidang Kemuncak Perniagaan Antarabangsa Selangor (SIBS) juga dimulakan pada 2015. Kini SIBS semakin dikenali malah hasil sambutan pelabur yang sangat menggalakkan, ia dilaksanakan sebanyak dua siri pada 2024.

Menginjak ke usia Jubli Perak pada tahun ini, Invest Selangor lebih yakin dan cekap dalam menguruskan sektor pelaburan bagi mempamerkan 'Selangor The Golden State of Malaysia' kepada dunia.

Sebagai negeri paling maju di Malaysia, pertumbuhan ekonomi Selangor teguh didorong oleh peranan yang dimainkan oleh Invest Selangor dalam membantu dan menyediakan infrastruktur perniagaan sekali gus mampu menyelesaikan isu-isu pembangunan yang dihadapi pelabur.



PENCAPAIAN SYARIKAT & PRESTASI PELABURAN SELANGOR



Hayati tradisi talagqi

RIBUAN bersyukur dan gembira dapat mendalami pemikiran ulama besar Imam an-Nawawi di Festival Turath Islami Selangor (FTIS) selama lapan hari yang berakhir pada 2 Jun.

Selain perbincangan kitab Hadis 40 dan Riyadus Salihin, festival ini mempamerkan lebih 20 manuskrip agama dan ilmu alam Melayu. Peserta juga dihidangkan selawat dan qasidah bersama kumpulan nasyid popular.

Ribuan peserta menadahi kitab di depan bekas Mufti Besar Mesir Prof Dr Ali Jum'ah Muhammad Abdul Wahab di Masjid Sultan Salahuddin Abdul Aziz Shah, Shah Alam.

FTIS dirasmikan Dato' Menteri Besar Dato' Seri Amirudin Shari pada 26 Mei. Seminar Penghayatan Riyadhu as-Salihin diluncur Perdana Menteri Datuk Seri Anwar Ibrahim pada 1 Jun.

Tokoh ulama yang berbicara termasuklah Prof Dr Said Aqil Siradj dan Dr Adi Hidayat dari Indonesia, Baba Ghazali Ahmad (Thailand) dan Prof Emeritus Dato Dr Osman Bakar (Malaysia).

Lensa HAFIZ OTHMAN, AHMAD ZAKKI JILAN, REMY ARIFIN, FIKRI YUSOF dan MOHD KHAIRUL HELMY MOHD DIN merakam acara menarik FTIS. Keterangan foto oleh HAFIZAN TAIB.



Ribuan jemaah menyertai Tausiyah Perdana pada 31 Mei yang menampilkan Dr Ali Jum'ah dan Dato' Menteri Besar



Perdana menteri melancarkan lima jilid terjemahan Ihya Ulumuddin dan syarah Hadis 40 ketika merasmikan Seminar Penghayatan Riyadhu as-Salihin di Shah Alam pada 1 Jun



Amirudin dan peserta mendengar Dr Ali Jum'ah mengupas kitab Hadis 40 selepas pembukaan Festival Turath Islami Selangor di Masjid Sultan Salahuddin Abdul Aziz Shah pada 26 Mei



Mustasyar Pengurus Besar Nahdlatul Ulama Prof Dr Said Aqil Siradj menyampaikan syarahan perdana mengenai Kepentingan Kitab Turath Dalam Sejarah Nusantara dan Masa Kini pada 29 Mei



Ulama selatan Thailand Baba Ghazali Ahmad Al-Fathoni menyampaikan kuliah maghrib bertajuk Pengenalan kepada Riyadhu as-Salihin Imam Nawawi di Shah Alam pada 29 Mei



Datuk Seri Anwar Ibrahim ketika sesi perbualan khas Imam Nawawi dan Riyadhhu as-Salihin selepas majlis perasmian Seminar Penghayatan Riyadhhu as-Salihin di Dewan Orkid, Masjid Negeri pada 1 Jun



Dato' Menteri Besar berucap ketika Darul Ehsan Berselawat dan Maulid Akbar pada 2 Jun. Selain perdana menteri, turut sama Habib Ali Zaenal Abidin Al-Hamid (kanan) dan Habib Jindan Novel Salim Jindan



Pengarah Pusat Kajian Islam Quantum Akhyar Institute Dr Adi Hidayat berkongsi kisah Kehidupan Imam An-Nawawi Sebagai Teladan Buat Pencari Ilmu di Shah Alam pada 31 Mei



Penyandang Kursi al-Ghazali, Institut Antarabangsa Pemikiran dan Tamadun Islam UIA Prof Emeritus Dr Osman Bakar bersyarah di sesi Memanfaatkan Riyadhhu As-Salihin Mengatasi Kemelut Kerohanian Muslim Moden pada 2 Jun



Kumpulan nasyid dari Syria Abu Shaar Bro mengalunkan qasidah dan selawat ketika Konsert Alunan Mahabbah di Dataran Karnival Stadium Shah Alam pada 1 Jun. Ditubuhkan pada 1983, kumpulan ini sering diundang ke acara keagamaan



Kira-kira 50,000 pengunjung menghayati Darul Ehsan Berselawat dan Maulid Akbar sempena penutup festival turath pada malam 2 Jun. Kumpulan popular Majelis Azzahir dari Pekalongan, Indonesia menjadi tarikan majlis ini



MODEN... Perdana Menteri Datuk Seri Anwar Ibrahim melawat pameran selepas merasmikan Hari Pendidikan dan Latihan Teknikal Vokasional (TVET) Negara 2024 di Institut Latihan Perindustrian (ILP) Kuala Langat, Banting pada 8 Jun. Facebook Anwar Ibrahim

Elak subsidi kepada warga asing

Jimat RM4 bilion, salur untuk rakyat

SHAH ALAM - Penjimatan hasil subsidi diesel bersasar dikembalikan kepada orang ramai termasuk menampung keperluan pengangkutan awam dan Sumbangan Tunai Rahmah (STR), kata perdana menteri.

Mengakui kaedah tersebut bukan langkah popular, Datuk Seri Anwar Ibrahim berkata perolehan RM4 bilion setahun itu dibuat melalui penelitian rapi pelbagai peringkat, lapor Bernama.

"(Penjimatan hasil penyesaran subsidi) diesel untuk tampung keperluan pengangkutan awam iaitu pengangkutan rakyat.

"Bayangkan STR untuk sembilan juta orang (penerima) yang (mendapat) subsidi tunai secara langsung, itu RM10 bilion.

"Wang (penyesaran subsidi) itu bukan untuk naikan elaun menteri ataupun kepentingan lain, saya tumpukan hal ini (bantuan rakyat)," katanya yang juga menteri kewangan pada 11 Jun.

Berucap dalam majlis perhimpunan warga Kementerian Kewangan di Putrajaya, Anwar menegaskan langkah itu bagi memastikan subsidi tidak diberi kepada kelompok maha kaya dan orang asing.

"Kita kena buat keputusan baik, harus bantu rakyat majoriti. Kita tidak harus beri subsidi kepada golongan maha kaya, industri besar dan orang asing.

"(Ini) bukan diskriminasi kepada orang asing kerana mereka tidak bayar cukai, cukai levi yang (dibayar) sangat kecil. Tanggungjawab pertama kita kepada warganegara kita," katanya.

Beliau memberitahu subsidi tetap diteruskan kepada nelayan dan pekebun kecil supaya nasib mereka terbelak selain memastikan penyesaran itu bukan alasan untuk menaikkan harga barangan.

RM200 juta tingkat kemahiran TVET

SHAH ALAM - Peruntukan RM200 juta disediakan bagi meningkatkan penyertaan belia untuk menceburi bidang Pendidikan dan Latihan Teknikal dan Vokasional (TVET), kata perdana menteri.

Datuk Seri Anwar Ibrahim berkata dana tambahan yang disalurkan itu bertujuan menggalakkan institusi TVET memperkasa program latihan seiring keperluan semasa pihak industri.

Beliau mahu bidang berkaitan industri berimpak tinggi termasuk kenderaan elektrik, teknologi elek-

trik, mekanisasi ladang serta automasi pertanian dan perladangan diberi nilai tambah.

"Ini memberi peluang kepada institusi TVET mewujudkan lebih banyak segmen kepada masyarakat orang kurang upaya, Orang Asli serta orang asal di Sabah dan Sarawak," katanya.

Beliau merasmikan sambutan Hari TVET Negara 2024 di Institut Latihan Perindustrian Kuala Langat di Banting pada 8 Jun.

Mengajak institusi TVET membuat anjakan bagi melonjakkan bidang ke-

mahiran itu ke tahap lebih tinggi, Anwar memberitahu peruntukan hampir RM8 bilion antara tertinggi dalam sejarah TVET.

"Antara sebabnya ialah negara memperoleh pelaburan atau FDI tinggi, yang pastinya pelabur memerlukan tenaga kerja mahir bagi pengoperasian syarikat mereka di sini.

"Negara seperti Amerika Syarikat dan Jerman yakin dengan kemahiran pada jurutera Malaysia, untuk itu kita perlu terus perkasa bidang TVET untuk sediakan tenaga kerja mahir," katanya.

12 syarikat saham lonjak keuntungan

SHAH ALAM - Sebanyak 12 syarikat Malaysia disenarai dalam 15 saham syarikat yang mencatat prestasi paling baik di Asia Tenggara dalam tempoh lima bulan pertama tahun ini.

Menteri Ekonomi Rafizi Ramli berkata syarikat itu mencatat keuntungan paling mendadak berdasarkan pemantau ekonomi menunjukkan negara berada di landasan baik, lapor Bernama.

Beliau percaya keadaan tersebut bakal berterusan, malah Malaysia diunjur sebagai negara maju baharu menjelang 2027 atau 2028 hasil kestabilan politik dan tanda-tanda pemulihan ekonomi.

"Mata wang Malaysia juga antara paling baik pada tahun ini dari segi pengukuhan, dengan unjuran ini, negara kita dijangka terus menjadi negara berpotensi di Asia Tenggara," katanya.

Teliti permohonan tambah baik subsidi

SHAH ALAM - Kementerian Perdagangan Dalam Negeri dan Kos Sara Hidup meneliti permohonan dan rayuan beberapa pihak bagi menambah baik Sistem Kawalan Diesel Bersubsidi (SKDS).

Menterinya Datuk Armizan Mohd Ali berkata ada pihak memohon untuk mempertimbang beberapa tambahan jenis kenderaan pengangkutan dalam senarai layak menikmati subsidi diesel.

Beliau memberitahu syor lain ialah meningkatkan kuota asas sedia ada bawah SKDS 1.0 bagi jenis kenderaan pengangkutan awam, lapor Bernama.

"KPDN teliti semua ini dan ia akan diangkat segera untuk pertimbangan Jawatankuasa Kelulusan Subsidi Diesel."

Media elak sentuh isu sensitif

SHAH ALAM - Perdana Menteri Datuk Seri Anwar Ibrahim memberi jaminan kebebasan media di negara ini selagi tidak memecah belah perpaduan negara dengan menyentuh isu raja, agama dan kaum.

Beliau menegaskan kerajaan sentiasa mendukung dan mempertahankan hak dalam memberi teguran dan kritikan, malah semangat itu kekal sejak prakemerdekaan negara, lapor Bernama.

"Tiada tindakan diambil atau kawalan terhadap ruang kebebasan wartawan dan media memberi pandangan, teguran dan kritikan.

"Semangat itu kekal, walaupun timbulkan sedikit keresahan kerana ketegasan kita (kerajaan) tangani isu keselamatan, fahaman cauvanisme dan perkauman atau aliran pelampau agama.

"Bukannya singgung soal kaum, raja tapi gunakan isu itu untuk pecah belah, porak-peranda (negara)," katanya dalam program Hadiah Kewartawanan Malaysia MPI-Petronas 2023 pada 7 Jun.

PRK Sungai Bakap bermula 22 Jun

SHAH ALAM - Suruhanjaya Pilihan Raya (SPR) menetapkan hari pengundian pilihan raya kecil Sungai Bakap, Pulau Pinang berlangsung pada 6 Julai.

Timbalan Pengerusinya Dr Azmi Sharom memberitahu tarikh penamaan calon dan pengundian awal pada 22 Jun dan 2 Julai, lapor Bernama.

Kerusi itu kosong ekoran kematian penyandang Nor Zamri Latiff, 56, pada 24 Mei di Hospital Seberang Jaya akibat keradangan dalam perut. Ia PRK kelapan selepas pilihan raya umum 2022.

Azmi berkata daftar pemilih tambahan bulan April 2024 yang dikemas kini hingga 24 Mei digunakan melibatkan 39,279 pengundi termasuk 57 anggota polis.

Ada sembilan pusat meliputi 65 tempat mengundi dan saluran selain satu tempat undian awal. Pusat penamaan calon dan pusat penjumlahan rasmi undi di Dewan Serbaguna Jawi, Taman Desa Jawi.

96 kes akibat cuaca panas

SHAH ALAM - Kes kumulatif bagi penyakit berkaitan cuaca panas setakat 10 Jun meningkat kepada 96 berbanding 93 kes pada 3 Jun, menurut Agensi Pengurusan Bencana Negara (Nadma).

Sebanyak 22 strok haba, kelesuan haba (68) dan kejang haba (6) dilapor. Hanya satu kematian baharu akibat strok haba pada 4 Jun menjadikan bilangan kematian meningkat kepada empat kes.

"Tiada kes yang dirawat di hospital pada masa ini. Semua kes mendapat rawatan dan sembuh," kata kenyataan Nadma pada 11 Jun.

Berkaitan status cuaca panas empat daerah di Semenanjung yang mencatat panas tahap berjaga-jaga pada 7 Jun, hanya dua mencatat tahap tersebut sehari kemudian.

Acara menarik Pameran Maha

SHAH ALAM - Pameran Pertanian, Hortikultur dan Agro Pelancongan Malaysia (Maha) pada 11 hingga 22 September menyajikan pameran bersifat interaktif yang menarik penyertaan anak muda.

Program di Taman Expo Pertanian Malaysia (Maeps) di Serdang bertema Menuai Harapan Membina Masa Hadapan itu juga membawa elemen teknologi terkini sektor pertanian, lapor Bernama.

Menurut Ketua Sekretariatnya Zurihanmi Zakariya, Maha kali ini menampilkan segmen baharu untuk menarik pengunjung iaitu 'Magical at Night and 3D Water Show' serta 'Kid Attraction'.

Menteri pertanian dan keterjaminan makanan Datuk Seri Mohamad Sabu dijadual melancarkan program tersebut pada 10 Jun.

130,000 pesawah dapat RM210

SHAH ALAM - Hampir 130,000 pesawah di Semenanjung Malaysia bakal menerima bantuan tunai RM210 per hektar per musim berikutan kenaikan kadar insentif pembajakan dan pengenalan insentif penuaian.

Menurut kenyataan pada 11 Jun, Kementerian Pertanian dan Keterjaminan Makanan pada 27 Mei menaikkan kadar insentif pembajakan selain memperkenalkan

insentif penuaian, lapor Bernama.

Pengumuman berkenaan juga menyebabkan kadar sedia ada insentif pembajakan naik daripada RM100 kepada RM160 per hektar per musim manakala insentif penuaian pula RM50 per hektar per musim.

Selain itu, kementerian berkenaan juga memberi jaminan subsidi diesel kepada nelayan terus kekal.

Kementerian Kewangan sebelum

ini mengumumkan program bantuan subsidi Madani (Budi Madani) termasuk Budi Agri-Komoditi kepada petani, penternak dan pengusaha akuakultur yang layak.

Harga diesel semua stesen runcit Semenanjung ditetapkan pada kadar RM3.35 setiap liter mulai 10 Jun iaitu harga pasaran tanpa subsidi mengikut formula mekanisme harga automatik.

RM200 sebulan terus ke akaun

30,000 terima subsidi tunai diesel

SHAH ALAM - Seramai 30,000 individu merangkumi pemilik kenderaan diesel persendirian serta petani dan pekebun kecil menjadi kumpulan pertama menerima bantuan tunai RM200 sebulan.

Menurut Menteri Kewangan II Datuk Seri Amir Hamzah Azizan, bantuan menerusi Budi Madani Individu dan Budi Agri-Komoditi dimasukkan ke akaun penerima mulai tengah malam 10 Jun.

Katanya, Budi Madani Individu adalah penyasaran subsidi untuk pemilik kenderaan persendirian

manakala Budi Agri-Komoditi kepada petani dan pekebun kecil, kedua-duanya RM200 sebulan.

Beliau memberitahu tiada tarikh tutup untuk kedua-dua inisiatif tersebut dan individu berkecukupan digesa membuat permohonan untuk mendapat manfaat berkenaan.

"Bantuan ini tidak ada tarikh tutup. Oleh itu, saya menyeru kepada mereka yang sememangnya berkecukupan sama ada bagi Budi Individu atau Budi Agri-Komoditi untuk memohon.

"Semakan dan rayuan boleh juga

dilakukan di laman web sama," katanya dalam sidang media penyasaran subsidi diesel di Putrajaya pada 9 Jun.

Pemilik kenderaan persendirian termasuk petani dan pekebun kecil boleh memohon melalui pautan <https://budimadani.gov.my> manakala pemilik kenderaan logistik boleh mendapatkan kad fleet menerusi <https://mysubsidi.kpdn.gov.my>

Harga diesel di Semenanjung ditetapkan RM3.35 bagi setiap liter iaitu harga pasaran tanpa subsidi bermula tengah malam 9 Jun. Harga seterusnya diumumkan setiap Rabu.

Nyamuk Wolbachia tangani denggi

SHAH ALAM - Operasi Nyamuk Wolbachia (WMO) yang bertujuan memerangi penularan denggi sejak 2019 berupaya mengurangkan bilangan kes antara 45 hingga 100 peratus membabitkan 19 lokaliti.

Timbalan Menteri Kesihatan Datuk Lukanisman Awang Sauni berkata kadar kematian kes denggi turun daripada 0.63 peratus pada 2000 kepada 0.08 peratus tahun lalu, lapor Bernama.

"Sehingga kini, sebanyak 35 lokaliti

melaksanakan WMO di seluruh negara," katanya ketika berucap melancarkan Sidang Kemuncak Denggi Asia ke-7 di ibu negara pada 5 Jun.

Beliau memberitahu pelbagai usaha dijalankan pada pelbagai peringkat melibatkan pihak berkepentingan negara, negeri dan daerah demi menangani wabak tersebut.

Lukanisman juga menjelaskan bilangan kes di seluruh dunia meningkat 13 kali ganda dalam tempoh dua

dekad, daripada 500,000 pada 2000 kepada 6.5 juta tahun lepas.

Katanya, kebanyakan peningkatan kes akibat jangkitan dari Malaysia dan negara Asia lain antaranya Thailand, Bangladesh, Vietnam dan Indonesia.

Beliau menambah tahun 2023 mencatat bilangan kes tertinggi secara global, melepasi puncak luar biasa pada 2019 iaitu lebih 6.5 juta kes dan lebih 7,300 kematian seperti dilapor WHO.

Guna kad diskaun Menu Rahmah

SHAH ALAM - Kementerian Perdagangan Dalam Negeri dan Kos Sara Hidup menggalakkan lebih ramai pengusaha makanan menyediakan Menu Rahmah menerusi kad diskaun khas.

Timbalan Menteri Fuziah Salleh memberitahu 117 pengusaha makanan mendaftar kad itu sejak diperkenalkan November tahun lalu termasuk 64 daripadanya peniaga di Kelantan, lapor Bernama.

Katanya, peniaga berpeluang

mendapat potongan harga barangan keperluan sehingga 40 peratus meliputi tujuh pasar raya yang menjadi rakan strategik kementerian melalui kad tersebut.

"Kita harap dengan tawaran ini, lebih ramai pengusaha makanan terlibat dengan penyediaan Menu Rahmah agar lebih ramai rakyat mendapat manfaat," katanya di Kota Bharu pada 8 Jun. Mengakui permohonan masih rendah, Fuziah menjelaskan kementerian

giat mempromosi kemudahan tersebut kepada peniaga selain mempercepat proses mendapatkan kad berkenaan.

"Sebelum ini, proses mendapatkan kad mengambil masa agak lama dan perlu mengikuti beberapa prosedur termasuk naziran, antara faktor ramai peniaga kurang berminat," katanya.

Beliau yang yakin kaedah baharu itu mendapat sambutan peniaga berkata kementerian juga berusaha memperluas penglibatan pasar raya dalam diskaun khas berkenaan.





HEBAHAN... Datuk Bandar Mohamad Zahri Samingon (belakang, tengah) bersama kakitangan Majlis Bandaraya Petaling Jaya (MBPJ) mempromosi program Sambutan Ulang Tahun Bandaraya Petaling Jaya ke-18 di pusat beli-belah Sunway Pyramid, Subang Jaya pada 8 Jun. Foto Sekretariat Media Unit Komunikasi Korporat MBPJ

PKNS bangun projek SA Sentral

Shah Alam jadi segi tiga emas ekonomi

Oleh **NORRASYIDAH ARSHAD**

SHAH ALAM - Projek SA Sentral yang melibatkan peremajaan beberapa bangunan di sini akan melonjak ibu negeri itu sebagai segi tiga emas yang membawa manfaat ekonomi untuk perniagaan tempatan.

Menurut ketua pegawai eksekutif kumpulan Perbadanan Kemajuan Negeri Selangor (PKNS), pelbagai kemudahan awam termasuk perpustakaan, kafe dan tapak niaga turut disediakan.

Dato' Mahmud Abbas memberitahu

projek tersebut juga diisi elemen budaya, sejarah dan teknologi hijau selain terus memperkukuh status Selangor sebagai pusat ekonomi.

"Shah Alam banyak terkait sejarah dan budaya. Jadi budaya lama seperti jogget akan kita bawa. Di SA Sentral, semua akan ada, lebih banyak perkara menarik disediakan," katanya pada 4 Jun.

Beliau menandatangani perjanjian persefahaman (MoU) MyDeco dengan Malayan Banking Bhd (Maybank) yang diwakili Ketua Pegawai Eksekutif Kumpulan Perkhidmatan Kewangan Komuniti Syed Ahmad Taufik Albar.

Pada April, Dato' Menteri Besar ber-

kata projek peremajaan mencakupi pusat beli-belah SACC, Plaza Perang-sang, Kompleks PKNS dan Menara MRCB mulai akhir tahun membabitkan kos RM2 billion.

Menurut Dato' Seri Amirudin Shari, projek secara berperingkat itu dijadual siap antara lapan hingga 10 tahun bagi merancakkan ekonomi setempat, lebih-lebih lagi kawasan itu ibu negeri.

Selangor juga bakal mewujudkan pentadbiran Lembah Klang Raya meliputi empat bandar raya iaitu Shah Alam, Klang, Subang Jaya dan Petaling melalui peruntukan RM2 juta.

RM15,000 untuk Gerobok Rezeki

SHAH ALAM - Program Gerobok Rezeki Majlis Bandaraya Shah Alam (MBSA) diadakan bagi membantu golongan berpendapatan rendah, kata Datuk Bandar Shah Alam Dato' Mohd Fauzi Mohd Yatim.

Beliau menjelaskan peruntukan sebanyak RM15,000 disediakan untuk tiga masjid terpilih meliputi zon utara, tengah dan selatan dalam pentadbiran MBSA.

Katanya, program tersebut kesinambungan daripada bantuan semasa

Covid-19 bagi membantu golongan yang terjejas pendapatan selain mendidik masyarakat supaya sentiasa prihatin.

"Kita menyediakan keperluan harian seperti beras, minyak, tepung dan sardin. Pentadbiran masjid akan memantau agihan ini supaya semua yang memerlukan mendapat manfaat.

"Ini sebahagian komitmen MBSA bagi meringankan beban golongan memerlukan," katanya dalam pelancaran program di Masjid Baitul Mahabbah, Seksyen 27 di sini pada 6 Jun.

Beliau berkata pengagihan barangan berkenaan tidak terhad kepada umat Islam sebaliknya terbuka kepada masyarakat setempat pelbagai kaum.

"Untuk permulaan, MBSA menyediakan barangan keperluan asas tetapi pada masa depan, kita sedia bekerjasama dengan mana-mana pihak swasta," katanya.

MBSA turut menyumbang RM3,000 kepada jawatankuasa Masjid Baitul Mahabbah untuk menjayakan kerja naik taraf demi keselesaan jemaah.

Khidmat percuma ulang tahun MBPJ

SHAH ALAM - Majlis Bandaraya Petaling Jaya (MBPJ) memberi pelbagai perkhidmatan percuma sempena sambutan ulang tahun perisytiharan bandar raya berkenaan yang ke-18 pada 20 Jun.

Menurut Unit Komunikasi Korporatnya, perkhidmatan itu antaranya parkir kenderaan di seluruh Petaling Jaya, penggunaan kemudahan sukan seperti kolam renang, padang dan gelanggang.

Mengikut kenyataan itu, kemudahan lain antaranya pemberian 1,000 anak pokok, pemberian racun jentik-jentik, keahlian perpustakaan setahun kepada 500 orang dan diskaun tong sampah beroda.

MBPJ juga mengajak orang ramai untuk memeriahkan pelbagai acara yang dijadual berlangsung khususnya hari kemuncak sambutan ulang tahun di Laman MBPJ, Jalan Yong Shook Lin pada 29 Jun.

Maklumat lanjut acara tersebut boleh diperoleh menerusi laman sesawang dan media sosial rasmi MBPJ.

Pantas tangani aduan rakyat

SHAH ALAM - Majlis Bandaraya Shah Alam (MBSA) akan meningkatkan mutu perkhidmatan termasuk memberi maklum balas segera aduan penduduk sama ada isu kecil atau besar.

Datuk Bandar Shah Alam Dato' Mohd Fauzi Mohd Yatim menambah MBSA juga bercadang untuk mencerikan bandar raya melalui acara kesenian terutama pada waktu malam pada hujung minggu.

"Kakitangan MBSA perlu menanamkan sikap untuk bertindak segera dalam memastikan perkhidmatan kepada masyarakat dapat selesai dengan berkesan.

"Kita juga mahu memeriahkan lagi bandar raya ini dengan pelbagai aktiviti bermanfaat seperti program berbentuk kesenian terutama ketika pada waktu malam hujung minggu," katanya pada 6 Jun.

Jom santai berkelah bersama MBKD

SHAH ALAM - Orang ramai dipelawa menyertai program Jom Berkelah Bersama Majlis Bandaraya Diraja Klang (MBKD) pada 23 Jun.

Diadakan di Mangrove Point, Pelabuhan Klang, program bermula jam 7 pagi hingga 1 tengah hari itu menawarkan pelbagai aktiviti menarik.

Kemasukan adalah percuma dan pengunjung digalakkan memakai pakaian berkonsep hijau.

"Jom semua bersantai dan berkelah dengan keluarga anda bersama MBKD pada 23 Jun ini. Pelbagai acara dan pertandingan dianjurkan," tulis MBKD.

Antara pertandingan yang dianjurkan adalah menghias tempat berkelah, hiasan terrarium, reka cipta pakaian daripada bahan kitar semula dan mewarna.

Mohon tajaan program huffaz

SHAH ALAM - Pelajar lepasan Sijil Pelajaran Malaysia (SPM) 2023 dipelawa permohonan tajaan pendidikan program huffaz profesional universiti dalam negara.

Program Tabung Kumpulan Wang Biasiswa Negeri Selangor dengan kerjasama Jabatan Agama Islam Selangor (Jais) boleh didahului sehingga 18 Ogos.

"Tajaan ini terbuka kepada pelajar lepasan SPM dari Maahad Integrasi Tahfiz Selangor (MITS) milik penuh Kerajaan Negeri.

"Permohonan tajaan adalah bagi pengajian Ijazah Sarjana Muda di universiti terpilih dalam Selangor dengan bidang pengajian tertentu," maklum Jais menerusi Facebook.

Syarat kelayakan dan permohonan laman sesawang pendidikan.jais.gov.my/huffazprofesional atau hubungi talian 03-5514 3400 serta WhatsApp 010-343 7054.

Peluang menang pakej umrah

SHAH ALAM - Lembaga Zakat Selangor (LZS) menawarkan hadiah pakej umrah tajaan penuh kepada pembayar zakat menerusi potongan gaji dan bayaran terus.

Menurut agensi zakat negeri tersebut, kempen Auto Zakat Bulanan itu bermula 1 Januari hingga 31 Disember 2024 melalui dua cabutan pada Ogos dan akhir Januari 2025.

"Bagi kategori skim potongan gaji, kempen ini terbuka kepada individu yang baharu membuat caruman dan yang ingin menambah caruman.

"Bagi bayaran terus, ia terbuka kepada semua individu dan syarikat sama ada pembayaran zakat atas pendapatan atau perniagaan," kata kenyataan di Facebook pada 6 Jun.

Serah RM19,000 wakaf tunai

SHAH ALAM - Seorang wanita mewakaf wang tunai RM19,000 kepada Perbadanan Wakaf Selangor (PWS) untuk diniatkan kepada ahli keluarganya yang meninggal dunia.

Norlela Kamaluddin hadir ke pejabat PWS baru-baru ini ditemani suami bagi menyerahkan wakaf berkenaan kepada Pengurus Bahagian Korporat PWS Muhammad Hafiz Bahari.

"Semoga ibadah wakaf yang dilaksanakan menjadikan jariah pahala yang berpanjangan sehingga yaumulakhirah," katanya di Facebook pada 5 Jun.

PWS turut menyeru orang ramai berwakaf tunai dalam talian melalui pautan fpx.wakafselangor.gov.my atau infaqpay.my/go/wakafselangor

Merujuk statistik di laman sesawang PWS, RM443.39 juta wakaf tunai dikutip pada 2022, meningkat RM65.05 juta berbanding tahun sebelumnya.

Mangsa terharu terima sumbangan

SHAH ALAM - Sumbangan wang tunai dihulur kepada keluarga mangsa kebakaran di Bandar Nusa Rhu di sini bagi meringankan beban mereka, kata EXCO Belia Najwan Halimi.

Beliau memberitahu api yang dipercayai berpunca akibat kebakaran kereta sebelum merebak ke rumah mengakibatkan hampir 80 peratus premis tersebut hangus pada jam 12.25 tengah malam.

"Syukur kejadian ini tidak melibat-

kan kehilangan nyawa. Kerajaan Negeri ucapkan takziah dan serahkan sedikit sumbangan untuk ringankan beban," kata wakil rakyat Kota Anggerik itu.

Najwan menyampaikan bantuan itu kepada wakil keluarga Suhaidi Hamzah, 62, pada 6 Jun. Hadir sama, Ketua Operasi Agihan Lembaga Zakat Selangor (LZS) Petaling Mohammad Sharil Ritin.

LZS turut menghulur sumbangan awal RM300 bagi membantu meri-

ngankan beban mangsa sebelum disuliti bantuan lain daripada agensi berkenaan.

Mengakui keluarganya masih terkejut dengan kejadian itu, Suhaidi berkata beliau bersama isteri, ibu mentua, empat anak, menantu dan seorang cucu sedang tidur ketika kejadian.

"Saya terharu dengan bantuan yang diserahkan. Saya sangat berterima kasih, ini dapat membantu kami sekeluarga," katanya yang kini tinggal di kediaman keduanya di Jeram, Kuala Selangor.

Permohonan hingga 24 Ogos

MBI agih RM3 juta insentif haji

Oleh **NORRASYIDAH ARSHAD**

SABAK BERNAM - Peruntukan RM3 juta untuk Insentif Haji Muassasah kepada 3,000 jemaah selesai diagih, kata ketua tanggungjawab sosial dan komunikasi korporat Menteri Besar Selangor (Pemerbadanan).

Ahmad Azri Zainal Nor memberitahu setiap jemaah menerima wang tunai RM1,000, meningkat RM500 berbanding sebelum ini selain menerima kit pengajangan diri.

"Tahun ini, kita peruntuk bantuan ke-

pada 6,000 jemaah dan separuh sudah menerimanya. Permohonan menggalakkan disebabkan sebaran meluas selain peningkatan nilai bantuan.

"Permohonan dibuka sehingga 24 Ogos. Jemaah yang sudah pergi (ke Makkah) juga boleh memohon dengan pergi ke pusat khidmat Dewan Undangan Negeri masing-masing," katanya pada 7 Jun.

Tahun ini, Kerajaan Negeri mempeperuntuk RM6 juta bagi menjayakan skim tersebut, meningkat tiga kali ganda berbanding insentif tahun lalu iaitu RM1.5 juta.

Sebanyak RM1.2 juta pula dise-

diakan untuk membiayai kos perjalanan 36 jemaah dari kalangan berpendapatan rendah menunaikan haji secara percuma.

Selain itu, Ahmad Azri menggalakkan orang ramai memohon Skim Insurans Am Selangor (INSAN) Takaful yang memberi perlindungan selama setahun berikutan kuota masih ada.

INSAN diperkenalkan pada 2022 memberi perlindungan sehingga RM10,000 bagi kes hilang upaya kekal dan kematian disebabkan kemalangan dengan kos premium ditanggung sepenuhnya Kerajaan Negeri.

MPKS dapat anugerah inisiatif hijau

SHAH ALAM - Majlis Perbandaran Kuala Selangor (MPKS) menerima Anugerah Kehormat pembangunan semula pekan lama Kuala Selangor dalam Anugerah Seni Bina Landskap Malaysia 2024, baru-baru ini.

Pihak berkuasa tempatan itu menerusi Facebook memaklumkan, kemenangan menerusi kategori Inisiatif Hijau diterima Pengarah Jabatan Landskap MPKS Norazean Abdul Rahman di sebuah hotel di Kuala Lumpur.

"Proses rejuvenasi pekan lama Kuala Selangor bermula melalui penubuhan pasukan khas bagi mengenal pasti ruang dan penambahbaikan pekan lama Kuala Selangor selaras dengan Matlamat Pembangunan Mampan," katanya.

Menurut MPKS, proses transformasi Pekan Lama Kuala Selangor bermula sejak 2019 dengan pembangunan semula Dataran Malawati yang kini merupakan mercu tanda baharu daerah berkenaan.

Dataran Malawati yang sebelum ini dikenali sebagai Padang Kemerdekaan dinaik taraf bertujuan meningkatkan kualiti kemudahan awam dan infrastruktur perbandaran selain sebagai kawasan tumpuan pelancong.

MPKS turut mewujudkan Laluan Seni Pekan Lama yang dipenuhi 15 jenis seni mural bertemakan warisan di dinding bangunan lama selain batu bata berwarna-warni sebagai tapak perjalanan kaki.

Kerjasama promosi di China

SHAH ALAM - Tourism Selangor memeterai memorandum persefahaman (MoU) bersama Acmar Marketing bagi meneroka potensi pasaran di negara itu dengan lebih luas.

Menurut kenyataan, kerjasama dengan syarikat pemaju berpangkalan di Xiamen, China itu dijangka membuka jalan kepada inisiatif promosi

silang termasuk peluang program perniagaan.

Pemeteraian itu diadakan dalam lawatan sempena 19th Strait Travel Fair and 9th China (Xiamen) International Leisure Tourism Expo diketuai EXCO Pelancongan Dato' Ng Suee Lim pada Mei.

"Selangor mempergiat strategi promosi dengan mengadakan misi jualan

bersasar di Xiamen, China dan memeterai MoU dengan Acmar Marketing," kata kenyataan pada 5 Jun.

Suee Lim berkata Kerajaan Negeri mengalu-alukan kerjasama agensi antarabangsa dan ejen pelancongan bagi meningkatkan peluang perniagaan menjelang Tahun Melawat Selangor 2025.



Pasukan MBSJ FC meraikan kejayaan menjuarai Liga Super Wanita 2024 menewaskan UiTM United Lioness di Arena MBSJ, Subang Jaya pada 9 Jun. Foto FIKRI YUSOF

SA United julang Piala Konfederasi

MBSJ FC pertahan juara liga wanita

Oleh FITRI HAZIM HAZAM

SUBANG JAYA - MBSJ FC mempertahankan kejuaraan Liga Super Wanita FAS 2024 selepas menewaskan UiTM United Lioness 3-0 dalam perlawanan akhir di Arena MBSJ di sini pada 9 Jun.

Semua gol MBSJ FC dijaringkan pada babak pertama menerusi Lee Xin Yi pada minit ke-25, diikuti jaringan Waitie Taming (32) dan Intan Sarah (34).

Duli Yang Teramat Mulia Raja Muda Selangor Tengku Amir Shah berkenan mencemar duli menyaksikan perlawanan dan menyempurnakan majlis penyampaian trofi dan hadiah.

MBSJ FC membawa pulang wang tunai RM10,000 beserta piala manakala UiTM United Lioness menerima wang tunai

RM7,000 serta pingat.

Jurulatih MBSJ FC berkata kejayaan pasukannya mempertahankan kejuaraan hasil komitmen tinggi yang ditunjukkan pemain sepanjang kejohanan.

Mohd Fairuz Mohd Noor turut menyoal pasukannya mewakili Selangor menyertai kejohanan Piala Tun Sharifah Rodziah (TSR) musim ini.

"Perasaan yang tidak dapat digambarkan dapat kekalkan kejuaraan, saya bangga dengan pemain yang beri komitmen hingga 150 peratus.

"Seterusnya saya berharap impian untuk beraksi di TSR jadi kenyataan memandangkan perbincangan dengan pengurusan untuk sertai kejohanan positif," katanyaselepas perlawanan.

Ketua pasukan Steffi Sarge Kaur bangga mengemudi MBSJ FC sehing-

ga bergelar juara buat dua musim berturut-turut.

"Kami berhak juara dengan menguasai sepanjang permainan. Tiga kunci kejayaan adalah kerjasama pasukan, disiplin dan komitmen pemain hingga 200 peratus," katanya.

Terdahulu, SA United menjuarai Piala Konfederasi 2024 menewaskan Real CJ 1-0 menerusi jaringan tunggal Nursyaza Nadzirah seawal minit keempat.

Berikut adalah senarai penerima anugerah kejohanan:

- Anugerah Kasut Emas – Intan Sarah: 19 gol (MBSJ FC)
- Anugerah Pemain Paling Bernilai – Intan Sarah (MBSJ FC)
- Anugerah Pejaga Gol Terbaik – Amyra Fariesha: 5 clean sheets (SSS Leapord)

Pan Gon mahu kekal latih Malaysia

SHAH ALAM - Ketua jurulatih pasukan kebangsaan Kim Pan Gon berhasrat untuk terus mengemudi Harimau Malaya walaupun skuad negara terlepas peluang untuk layak ke pusingan ketiga kelayakan Piala Dunia 2026.

Pengendali warga Korea Selatan itu berkata beliau mahu kekal bersama pasukan kebangsaan sehingga Piala Asia 2027 walaupun kontraknya tamat awal tahun depan, lapor Bernama.

Bagaimanapun, bekas pengarah pasukan Persatuan Bola Sepak Korea (KFA) berusia 55 tahun itu akan menyerahkan

keputusan mengenai nasibnya kepada Persatuan Bolasepak Malaysia (FAM).

"Mengenai kontrak saya harus kekal di sini dan saya tidak pernah meminta untuk meninggalkan pasukan. Sebaliknya jika dipaksa keluar, saya akur... saya sentiasa berusaha di sini tetapi dari semasa ke semasa saya letih, sangat letih tetapi akhirnya berdiam diri dan berjuang.

"Tetapi ini (kekal atau pergi) bukan keputusan saya dan semua bergantung kepada FAM, media, peminat dan kelab," katanya.

Pan Gon berkata demikian ketika ditanya mengenai masa depannya dalam sidang media selepas Malaysia menewaskan Taiwan 3-1 dalam perlawanan terakhir Kumpulan D pusingan kedua Piala Dunia 2026/Piala Asia 2027 di Stadium Nasional Bukit Jalil, Kuala Lumpur pada 11 Jun.

Harapan Malaysia untuk melangkah lebih jauh dalam kempen kelayakan Piala Dunia 2026 berakhir walaupun menang berikutan keputusan seri 1-1 yang dicatat Kyrgyzstan ketika menentang Oman.

Persiapan atlet SUKMA lancar

SHAH ALAM - Kontinjen Selangor kini dalam keadaan 85 peratus bersedia bagi menghadapi Sukan Malaysia (SUKMA) Ke-21 di Sarawak pada bulan hadapan.

EXCO Sukan Najwan Halimi berkata kontinjen negeri dalam proses memuktamadkan senarai atlet berkelayakan selain melipat gandakan usaha dan latihan secara intensif.

"Kita dalam keadaan cukup bersedia. Senarai sudah 85 peratus persediaan. Kita juga sudah turun ke Sarawak untuk lihat persiapan logistik di sana.

"Dalam masa yang sama kita juga dalam proses muktamadkan senarai atlet dan lipat ganda usaha dengan latihan selain sasaran kedudukan tiga teratas," katanya 6 Jun.

Skuasy berpasukan campuran raih emas

SHAH ALAM - Pemain skuasy negara Sanjay Jeeva dan K Sehveettra mempamer prestasi cemerlang membantu Malaysia meraih pingat emas acara berpasukan campuran selepas menewaskan Filipina 2-0 dalam Kejohanan Piala SEA.

Sanjay memberikan mata pertama negara menewaskan David Pelino diikuti kemenangan Sehveettra ke atas Jemyca Aribado di Kompleks Sukan Memorial Rizal, Manila, lapor Bernama.

"Saya mengalami sedikit tekanan dan terpaksa memberikan beberapa mata mudah yang membantu Jemyca untuk mengejar tetapi saya berjaya mengatasinya dan menang dalam 'straight' set.

"Semua pemain negara melakukan yang terbaik dan tiada siapa yang mempamerkan prestasi buruk dalam mana-mana perlawanan (menuju ke final)," kata Sehveettra pada 9 Jun.

Wei Chong-Kai Wun dipuji konsisten

SHAH ALAM - Pengarah kejurulatihan Akademi Badminton Malaysia (ABM) memuji tahap konsisten dipamerkan beregu lelaki negara Man Wei Chong-Tee Kai Wun pada sepanjang Terbuka Indonesia.

Rexy Mainaky berkata perkembangan gandingan ke-20 dunia itu boleh dianggap sebagai satu pencapaian positif buat mereka yang sebelum ini sering terkandas di pusingan pertama lima penyertaan di Super 1000 sejak 2022.

"Apapun, mereka masih perlu melihat peluang yang ada di depan mata untuk mengambil keputusan sepatutnya bagi mengatasi lawan. Harap di masa hadapan, mereka tetap terus konsisten dan fokus kepada karier untuk lebih baik dan harus bersiap menjadi pemain dalam kelompok kelas utama," katanya seperti dilapor Berita Harian.

Wei Chong-Kai Wun menamatkan kejohanan bertaraf Super 1000 itu selaku naib juara selepas tewas kepada beregu nombor dua dunia dari China, Liang Wei Keng-Wang Chang 21-19, 16-21, 12-21.



MOHD KAMRI KAMARUDDIN
Bukit Antarabangsa

bergotong-royong membersihkan tanah perkuburan di Ukay Perdana, Ampang Jaya

DATUK RIZAM ISMAIL
Sungai Air Tawar

bertemu penduduk kematian ahli keluarga di DUN beliau



ANFAAL SAARI
Taman Templer

menziarahi penduduk ditimpa kemalangan di DUN beliau

LEONG TUCK CHEE
Pandamaran

meninjau kerja pembaikan jalan di Persiaran Raja Muda Musa, Klang



CHUA WEI KIAT
Rawang

menyampaikan sumbangan bantuan Kembali ke Sekolah di DUN beliau

DANIAL AL-RASHID
Batu Tiga

melawat program kesihatan pergigian di Kampung Padang Jawa, Shah Alam



LWI KIAN KEONG
Sungai Pelek

menyertai pertandingan membuat ketupat Cina di DUN beliau

MUHAMMAD IZUAN KASIM
Kota Damansara

bertemu penduduk sempena ziarah medik di Shah Alam



Pantau kawasan risiko banjir kilat

SHAH ALAM - Kawasan banjir sekitar Dewan Undangan Negeri Pelabuhan Klang sentiasa dipantau bagi memastikan bantuan segera disalurkan kepada penduduk jika bencana berkenaan melanda.

Wakil rakyatnya Azmizam Zaman Huri berkata pihaknya tidak menerima laporan banjir kilat ekoran fenomena air pasang besar yang diramal berlaku di stesen Pelabuhan Klang baru-baru ini.



Katanya, kawasan tumpuan antaranya Kampung Telok Gong, Kampung Pulau Indah, Taman Teluk Gedung Indah, Taman Selat Selatan, Taman Selat Damai dan sebahagian Pandamaran Jaya.

"Ini antara kawasan tepi laut dan kebarangkalian untuk banjir jika air pasang besar tinggi, lebih-lebih lagi jika bertembung dengan hujan lebat.

"Ketika air pasang besar, pintu kunci air ditutup bagi mengelak air laut

melimpah ke darat. Jika hujan terlalu lebat, air tidak mengalir ke laut risiko banjir tinggi," katanya pada 6 Jun.

Beliau berkata penduduk juga dinasihati memantau saluran dan longkang sekitar kediaman masing-masing bagi memastikan tiada halangan air yang boleh menyebabkan risiko bah.

"Mereka yang membuat pengubahsuaian rumah juga perlu memastikan sisa binaan terutama pasir dibuang ke tempat betul kerana ia juga boleh menyebabkan longkang tersumbat," katanya.

Bantuan untuk enam bulan

Serah RM300 barangan asas

Oleh **SHEEDA FATHIL**

SHAH ALAM - Seramai 30 keluarga di Dewan Undangan Negeri Sekinchan menerima bantuan bulanan barangan keperluan asas bernilai RM300 bagi meringankan perbelanjaan isi rumah mereka.

Wakil rakyatnya Ng Suee Lim berkata pemberian selama enam bulan berturut-turut itu tidak termasuk Bantuan Kehidupan Sejahtera Selangor (BINGKAS), juga bernilai RM300 sebulan.

"Ini antara usaha kami untuk meringankan beban perbelanjaan keluarga berpendapatan rendah. Setiap penerima diberi barangan keperluan asas dari syarikat ISP Group itu selama enam bulan.

"Kemudian DUN pilih keluarga lain pula yang kurang berkemampuan. Kita buat penilaian dari semasa ke semasa bagi memastikan hanya yang benar-benar layak terima manfaat," katanya pada 8 Jun.

Beliau menegaskan pentadbiran



negeri sentiasa berusaha bersungguh-sungguh untuk meringankan beban rakyat dengan melaksanakan pelbagai program kebajikan untuk semua golongan.

Dalam perkembangan lain, Suee Lim berkata 20 kambing dan enam lembu diagih kepada ahli majlis dan ketua kampung untuk diserahkan kepada pengurusan masjid dan surau sekitar Sekinchan.

Atasi masalah pembentungan limpahan

SHAH ALAM - Kejadian limpahan air ke jalan raya yang berpunca dari aliran sungai yang deras hingga menjejaskan 16 unit rumah di Taman Desa Melor, Hulu Selangor segera diatasi.

Menurut penyelaras Dewan Undangan Negeri Batang Kali, pihaknya akan menyediakan jentera pengorek bagi membersihkan pembentung longkang yang tersumbat.



Saifuddin Shafi Muhammad berkata pihaknya bersama Penghulu Mukim Serendah, Persatuan Penduduk Taman Desa Melor dan Penguatkuasa Pejabat Daerah Tanah Hulu Selangor meninjau sejurus menerima aduan pada

10 Jun.

"Selepas membuat penelitian bersama, aliran air Sungai Durian yang deras menjadi punca aliran air kuat menye-

babkan air melimpah ke jalan raya.

"Selain itu, pembentung longkang tersumbat juga tidak dapat menampung aliran air yang kuat ketika hujan lebat," katanya yang turut memaklumkan kerja pembersihan akan dilakukan sebaik mencapai persetujuan penduduk.

Menurut Saifuddin, keadaan air melimpah itu berpunca daripada anak sungai berdekatan projek Laluan Rel Pantai Timur.

16,000 pelajar terima bantuan sekolah

SABAK BERNAM - Lebih 90 peratus daripada 16,800 pelajar dari keluarga berpendapatan rendah menerima bantuan persekolahan daripada Menteri Besar Selangor (Pemerbadanan) atau MBI sejak Mac.

Sumbangan bernilai RM100 setiap seorang melalui program Kembali ke Sekolah meringankan beban mereka yang memerlukan, kata ketua tanggungjawab sosial dan komunikasi korporatnya.

"Hanya tinggal satu atau dua Dewan Undangan Negeri (DUN) yang belum

serahkan (bantuan) kepada penerima. Kita jangka agihan selesai dalam masa terdekat," kata Ahmad Azri Zainal Nor.

Ditemui pada majlis serahan kepada 300 pelajar DUN Sabak pada 7 Jun, beliau berkata senarai penerima dikenal pasti pejabat DUN dan dinilai MBI untuk memastikan mereka benar-benar layak.

"(Agihan) merupakan peruntukan tahun ini, namun serahan hanya dapat dilakukan hari ini. Semoga bantuan



dapat mengurangkan beban ibu bapa," katanya.

Tahun ini, MBI membelanjakan RM1.7 juta untuk membantu 16,800 pelajar dari keluarga kurang berkemampuan membeli keperluan sekolah.

Sepanjang tahun lalu, anak syarikat negeri itu memperuntuk lebih RM10 juta bagi memperkasa sektor pendidikan merangkumi Program Tuisyen Rakyat Selangor, bantuan sekolah dan sumbangan prasarana.

RM20,000 tingkat kemudahan surau

SHAH ALAM - Pusat Khidmat Masyarakat Parlimen Bangi baru-baru ini menghulurkan sumbangan RM20,000 kepada Surau Nurul Falah Taman Sinaran, Kajang bagi menambah baik kemudahan sedia ada.

Wakil rakyatnya berkata bantuan menerusi Projek Mesra Rakyat Parlimen Bangi digunakan untuk memasang pendingin hawa, kamera litar tertutup, televisyen dan kipas demi keselesaan jemaah.

"Saya sebenarnya kerap berkunjung ke surau ini dan kawasan rukun tetangga Taman Sinaran ini memang aktif bekerjasama dengan pihak surau.

"Apabila kami dimaklum ada keperluan kita teragak-agak untuk memberi sumbangan daripada Pejabat Parlimen Bangi untuk membantu," kata Syahredzan Johan menerusi rakaman di Facebook.

Setiap wakil rakyat menerima peruntukan RM2 juta daripada kerajaan persekutuan bagi melaksanakan Projek Mesra Rakyat.

Agih 14 ternakan sempena Aidiladha

SHAH ALAM - Sebanyak 15 masjid dan surau di Dewan Undangan Negeri (DUN) Pandamaran menerima tambahan sumbangan lembu dan kambing korban menjelang sambutan Aidiladha pada 17 Jun.

Menjelaskan Kerajaan Negeri mepertukur empat lembu dan 10 kambing untuk setiap DUN, wakil rakyatnya Tony Leong Tuck Chee memberitahu pihaknya menambah bilangan ternakan korban.

"Mengambil kira keperluan serta saiz kambing agak kecil, DUN Pandamaran menyediakan peruntukan tambahan hampir RM15,000 untuk membeli kambing dan diagih kepada surau.

"Secara keseluruhan, sempena Aidiladha ini setiap masjid akan menerima seekor lembu manakala surau pula dua ekor kambing," kata beliau pada 10 Jun.

Insentif untuk pelajar cemerlang

SHAH ALAM - Pelajar cemerlang Sijil Pelajaran Malaysia (SPM) 2023 sekitar Dewan Undangan Negeri (DUN) Kuala Kubu Bharu ditawarkan insentif wang tunai bagi merai kecemerlangan mereka.

Wakil rakyatnya Pang Sock Tao memberitahu permohonan sehingga 20 Jun itu terbuka kepada pelajar yang memperoleh keputusan sekurang-kurangnya 5A.

"Syarat kelayakan termasuklah salah seorang ibu atau bapa pengundi DUN Kuala Kubu Bharu," katanya di Facebook.

Mereka boleh mendaftar melalui pautan docs.google.com/forms/d/e/1FAIpQLScdxk-79e9Dgzt6NuE31-YpQ7UgW-JDGCO-YbBeBNait6aaFOW/viewform?usp=sf_link dengan memuat naik sijil kelahiran dan slip keputusan SPM.



Perutusan Aidiladha 1445 Hijrah

Umat bertakwa, berilmu

Saya bersyukur kita dapat bersama-sama melalui detik penuh bermakna dan berkesempatan mengutuskan warkah dari tanah suci sewaktu melaksanakan ibadat haji pada tahun 2024/1445.

Kita mengenang kisah pengorbanan Nabi Ibrahim A.S, Nabi Ismail A.S, dan Siti Hajar. Peristiwa korban Habil dan Qabil turut dikenang.

Kesemua kisah ini membawa makna dan erti pengorbanan yang mensyaratkan ketakwaan. Tanpa adanya ketakwaan untuk mengisi pengorbanan, boleh dikatakan tindakan kita untuk berkorban tidak sempurna sepenuhnya.

Allah menyebut beberapa sifat orang bertakwa, antaranya yang disebut dalam al-Baqarah, ayat 177, ialah "seseorang yang mendermakan harta yang disayanginya kepada sanak saudara, anak-anak yatim, orang miskin, orang yang terputus belanja ketika dalam perjalanan mengerjakan sesuatu yang murni."

Ini merupakan nilai universal yang cukup penting buat manusia dan kemanusiaan.

Seperti kisah agung pengorbanan Nabi Ibrahim A.S serta anakandanya Nabi Ismail A.S bermula dengan berita 'buruk' tentang arahan penyembelihan sebelum akhirnya mendapat rahmat dan maghfirah daripada Tuhannya, begitu juga yang telah kita lakukan secara satu masyarakat yang bersama dalam berjaya keluar dari episod ngeri Covid-19 dan kini tangkas mencapai pemulihan.

Dengan tekad ingin mengangkat martabat komuniti dan membina masyarakat yang yakin dengan



diri serta dipenuhi ilmu, itu yang mempunyai hasrat Kerajaan Negeri dalam mendepankan usaha seperti Festival Turath Islami 2024 yang baru berlangsung bagi meraikan kekayaan karya Islam yang bertujuan membangun masyarakat yang berwawasan, berakhlak, serta berkaliber.

Saya mengambil peluang ini untuk mengucapkan Selamat Hari Raya Aidiladha kepada seluruh komuniti umat Islam di negeri Selangor.

Semoga kita semua dikurniakan keyakinan dan kebolehan untuk berjaya di negara yang kita cintai ini sambil mengecapi peluang untuk terus melakukan kebaikan dan pengorbanan dengan cara masing-masing demi mencapai penyempurnaan pengabdian kita kepada Allah Azza Wa Jalla.

Dato' Seri Amirudin Shari
Dato' Menteri Besar

MB tiba di Makkah, tunai ibadat haji

SHAH ALAM - Dato' Menteri Besar Dato' Seri Amirudin Shari berangkat ke Arab Saudi pada 8 Jun bagi menunaikan ibadah haji di tanah suci Makkah.

Beliau bersama isteri Datin Seri Masdiana Muhamad dan anak-anak turut menyatakan penghargaan kepada umat Islam yang menitipkan doa kepada mereka.

"Saya mohon doa agar urusan saya dan isteri sepanjang permusafiran kami dipermudahkan Allah SWT dan diterima segala amal ibadah kami," katanya di Facebook pada 9 Jun.

Menurut Menteri Haji dan Umrah Arab Saudi, Tawfiq al-Rabiah, seramai 1.2 juta jemaah dari pelbagai negara berada di Arab Saudi untuk menunaikan Rukun Islam kelima pada tahun ini.

Berdasarkan agensi berita rasmi Saudi Press yang dipetik AFP, Hari Arafah bermula 15 Jun pada tahun ini diikuti hari raya Aidiladha keesokan harinya.

Harga barangan JER lebih rendah

Enam lokasi jualan murah Aidiladha

Oleh **NORRASYIDAH ARSHAD**

HULU LANGAT - Jualan Ehsan Rahmah (JER) mega sempena Aidiladha diadakan meliputi enam lokasi bagi memudahkan umat Islam menyambut perayaan tersebut, kata EXCO pertanian.

Ir Izham Hashim memberitahu program itu diadakan pada 15 Jun melibatkan Dewan Undangan Negeri (DUN) Sungai Tua, Kuala Kubu Bharu dan Pelabuhan Klang antara 8 pagi hingga 12 tengah hari.

Beliau menambah jualan kendalian Perbadanan Kemajuan Pertanian Selangor (PKPS) itu diteruskan pada

keesokannya meliputi DUN Pandan Indah, Tanjung Sepat dan Dusun Tua.

"Setiap kali menjelang perayaan, Kerajaan Negeri akan adakan jualan mega. Ini memudahkan penduduk mendapat keperluan pada harga lebih murah dari pasaran.

"Jualan ini berskala lebih besar. Kita tambah kuantiti produk, contohnya 1,000 ayam dijual setiap tempat," katanya pada 9 Jun.

Sempena sambutan Aidilfitri pada April lalu, Kerajaan Negeri menganjurkan jualan mega meliputi 18 lokasi bagi memudahkan golongan berpendapatan rendah berbelanja keperluan raya.

Lima barangan utama iaitu ayam,

daging, telur, minyak masak dan beras dijual pada harga bersubsidi melibatkan peruntukan RM296,439.

JER menawarkan ayam RM10 seekor, daging pejal segar (RM10 setiap pek), telur gred B (RM10 sepapan), ikan kembung (RM6 setiap pek), minyak masak lima kilogram (RM25) dan beras lima kilogram (RM13).

Sepanjang tahun ini, JER diadakan meliputi lebih 1,800 lokasi tidak termasuk program jualan murah di beberapa cawangan pasar raya Segi Fresh pada hujung minggu.

Lokasi boleh disemak di Facebook PKPS, imbas kod QR di poster jualan atau pautan linktr.ee/myPKPS